



# مقابلات ذاكرة الأسرى



التفريغ

**محمود طويط**  
**الجزء الأول**  
**حوار أحلام التميمي**  
**7 أيلول / سبتمبر 2023**



## مقابلة محمود طويط (الجزء الأول)

مقابلة أجرتها أحلام التميمي، ضمن سلسلة مقابلات ذاكرة الأسرى، أجري اللقاء في عمّان، يوم 7 أيلول / سبتمبر 2023.

محمود طويط: [00:00:00]

اسمي محمود إبراهيم محمود طويط، تاريخ الميلاد خمسة وعشرين إثني عشر ثلاثة وخمسين، في الوقت الذي ولد فيه المسيح كما يقال، أبوي إبراهيم تيمناً بإبراهيم الخليل، أمي مريم ومريم تعرف يعني في كثير من إلهها مريم العذراء، أمي الحنونة عندها صفات كثيرة، دائماً مسامحة الله يرحمها، وأبوي أب وصديق ورفيق عشت معه كثير، نزلت عملية لم يكتب لي الشهادة، لأنني عشت معه بعد الإفراج ثلاثين عام، بلدي الرمثا المضيفة الثائرة الوطنية، تستقبل كل ضيوفها بكل احترام.

أحلام التميمي: [00:01:23]

تاريخ الاعتقال وتاريخ الإفراج.

محمود طويط: [00:01:24]

تاريخ الاعتقال سبعة وعشرين تسعة، أربعة وسبعين بعد أكتوبر بعام، لأننا شاركنا في سورية بمعركة أكتوبر ونزلنا عملية في نفس التاريخ ولكن بعد عام.

أحلام التميمي: [00:01:44]

رح نحكي عنها ولكن يعني نرجع بالذاكرة بدنا نبلس من البدايات.

محمود طويط: [00:01:50]

إن شاء الله.

أحلام التميمي: [00:01:51]

حكيت عن الوالد والوالدة اللّٰه يرحمها، وحابين ترجع لجو العائلة لذكريات طفولتك في الرمثا، ما تحمله الذاكرة.

محمود طويط: [00:02:02]

نعم.

أحلام التميمي: [00:02:02]  
عن الرمثا عن الوالد عن الوالدة.

محمود طويط: [00:02:05]

نعم.

أحلام التميمي: [00:02:06]

شو كانوا يحدثوكم كونكو إنتوا عائلة أردنية، عن القضية الفلسطينية في الثمانية وأربعين والأحداث إلّي صارت كيف نقلوا لكم إياها؟

محمود طويط: [00:02:15]

والدي بدا من الصفر، لم يورث من أبوه أي إشي، كان مكافح في بداياته كان ينزل عيافا وحيفا، طبعا هديك الأيام كان هناك فقر بالأردن في الرمثا بالذات، ويروحوا يشتغلوا بفلسطين، يعني الوسيلة الوحيدة إلّي كانت كل هالرماتنة يسحبوا حالهم ويروحوا مشي عفلسطين منشان يعملوا، وكان بحدثني طبعا شو في في فلسطين وشلون درجة الألفة بيناتهم، وكان بحكي لي عن اليهود بإنهم أقلية، أي واحد منا يمسك حنفيه الكل فيلم، أبوي ذكي بطبيعته بالمدرسة كثير فكانوا يحطوه مراقب، لكل العمال إلّي هناك، أبوي كان يشرح الدرس للأستاذ بدل الأستاذ، أبوي درس صفيين الثالث والرابع، وكان هو إلّي بشرح بقول له يا إبراهيم إطلع اشرح للطلاب، أبوي بدر يعني بحكي انجليزي وهوّ بالرابيع ابتدائي، فكان هناك بفلسطين يعني يساعده ذكائه ومستمر، طبعا الر الرحلة كانت شاقّة وإحنا لمن كنا نطلع من الرمثا، نصل حيفا ويافا نشغل عند هالموانئ وها، يعني تلاقي قد ما إحنا مش ملاقين حمام وإشي وكذا وكذا، إحنا انقي القمل إلّي بروسنا، كان فقر شديد كثير يعني فيضطروا همّه ويقعدوا شهرين ثلاثة أربعة ويعودوا للأردن، هناك بالأردن يشتغل بالحصيدة يحصد الزرعه طبعا بالأجار طبعا.

أحلام التميمي: [00:04:07]

ما ماكان عندكم بالرمثا أرض خاصة إلكم؟

محمود طويط: [00:04:10]

بقول لك أبوي ما توژث، آه فكان إيش هو بعيش حياته كفاح، إيه تعرض للاعتقال في فلسطين أيام الإنجليز، ها طبغًا مهوكل واحد عربي وفلسطيني معرّض للشغلة هاي، يعني بالفطرة كل الناس إيش أعداء إلهم للإنجليز.

أحلام التميمي: [00:04:33]

حدثك الوالد عن فترة اعتقاله لاحقًا عند الإنجليز كم قعد عندهم.

محمود طويط: [00:04:40]

بالضبط لأ، بس يعني فترة إيه بمثابة توقيف أكثر من توقيف شغلات زي هيك يعني مش كقضية، أما هو عاصر ويعرف عن الثورة وخلفياتها، أما كان هو يعني مراقب بالعمل على العمال الموجودين، بعد الفترة هاي رجع للأردن، وصلت الأمور يعني إنه ما فيش شغل هون وهون، كان يلجأ لوسائل أخرى وهو وجيراننا، يعني بقول لي هاظ محمود الحكيم وهاظ فلان هاظ فلان، كلنا إيش عندنا أفخاخ للعصافير نروح ننصب هالفخاخ وشو بيحي من العصافير نوكل فاش أكل بالمره، يعني أنا بعد فترة كنت معاصر إل الإشي هاظ، كان أحيانًا لما يصيد يجيب عصفور عصفورين ثلاث طيبات، طبغًا كنا ساكنين بغرف من الط من طين بالشتاء تقول مزراب الدلف وهاظا وشغلات زي هيك.

أحلام التميمي: [00:05:48]

كيف الوالدة يعني ضبطت الأمور رغم هذا الفقر؟

محمود طويط: [00:05:52]

الوالدة كانت مرتبة وشاطرة في عندنا فرن طابون تخبز، في اشتروا بقرة ولدت البقرة، كانت هي شو تسوّي؟ تسوّي سمنة ولبن وشغلات زي هيك، لما أنا كنت دروح عالمدسة بل بالبداية كانت تجيب شقفة جبنة تسوّخها وتحط عليها سكر وتقول لي غمس برغيف الطابون هاظ أكل، طبغًا في فترة من الفترات صار في حركة بدھا تتطور الأمور، أبوي شارك واحد بدهم يروحوا عالسعودية، من الجهمنة خالد الإبراهيم يعني زلة معروف وزلة زي إلي تقول إقطاعي يعني بالأرض والمواشي، راحوا أول سفرة ما زبطتش، فكوا الشركة، بعد فترة عاود راح مرة ثانية توفيق بالسعودية، بالسعودية هناك كان إيه المحلات بعرعر هاي المنطقة الشمالية بالسعودية إلي

هي عرعر، طبغًا أنا كبرت شوي شوي صرت في الصف الرابع الخامس، أيام أول كان في فترة ثلاث شهور عطلة صيف المدرسية، قلت له بدي أروح معك قال لي أقعد قلت لا بدي أروح معك، مين شركاه من العزايزة محمد محسن علي المحسن وفلان وفلان إبراهيم المحسن الله يرحمه، يقول يا زلة خذ هالولد خليه يطش، رحت أول سنة لهنالك، شوفت هالوكالة تعلمت صرت أبيع مع أبوي، هسة الزبائن سبحان الله يعني لما الواحد بده إيش يجيب الرزق لواحد بكون سهل، هناك في فلسطينية وأردنية مصرية كلهم هذول دكاترة وأساتذة بدرّسوا هناك السعوديين بمنطقة عرام، ييجوا مين هاظ يا إبراهيم هاظا ابني محمود، صار في ألفة بيني وبينهم، أهلاً محمود كيفك يا محمود أعطيني يا محمود يجيب الكيش هاظ يا محمود صار في علاقات، انعرف أبوي طبغًا شو كنا نوخذ، يعني نروح نجي نجيب من إربد واحد اسمه محمود مصباح، هاظا ببجيب خضرة بنوخذ منه، أبو الليل دار أبو الليل، هاظ في منهم لعيبه كمان بيه، بالنادي العربي كانوا، بيعوا موز، كل إشي يحط أبوي بهالسيارة، وقبل هيك انروح وين؟ عمراوة منطقة الرمثا بس عمراوة، هاي بطيخها زي جنين، نحط البطيخات بالسيارة من قدام والباقيات الخضريات من ورا، وشو كمان نحط من الآخر أكياس تبين منشان الحلال هناك عندهم في السعودية.

محمود طويط: [00:08:50]

انعرف أبوي كل ما تيجي سيارة تلفونات دك دكاترة، إجت خضرة إبراهيم طويط، المهم صرت أنا أكتب الدكتور هاظا يقول سجلي أني بكرة باجي كذا سجلت، في أكياس ورق أول كان، صرت أكتب برضو أني شاطر زي أبوي بالكتابة، إجيت بدي أسجل ملقيتش الكيس، يا دكاترة يا وزا مين أخذ الكيس مين أخذ الكيس؟ وصرت أصيح أنا صوتي دائماً هيك، كل الدكاترة مالك يا محمود شو في؟ أبوي يقول لي مالك يابا شو في؟ قلت له الكيس إلي سجلت عليه الحسابات راح، ولّا جاي دكتور بركض هاظا هو يا محمود هدي هدي هاظا الكيس تبع الحسابات، تطورت العلاقات وصار أبوي يروح يجيب الخضرة، وأظل أنا موجود بالمحل، طبغًا إحنا بجنبنا إيش إيه في سوبرماركت وفي مطعم كبير وفي مخبز يعني إيش مخبز فرن، هظول أصلهم سوريين بس متجنسين وسعوديين، شو بدك يا محمود تعال يا محمود أيّا يعني زي ما تقول صار فيه ألفة كثيرة، كان كمان هناك يقعدوا عالقهوة ناس من السعوديين كبار هيك إو، في منهم يعني إلهم أراء سياسية كذا، يجوا شلونك يا محمود يصيروا يسألوني من هون لمهون، يعني زي ما تقول أعطيهم الوضع، استمر الوضع هاظا بالسعودية لفترة، صارت الحركة عند أبوي كويسة، وضعنا تحسن إلا قال إذا بدي أعمر بدل بيوت بيوت الطين كان يمكن من أوائل الناس إلي حطوا واجهة حجر دارنا. هناك طبغًا الحي إلي عندنا إحنا ساكنين فيه، في ألفة في داهود في شروع في عزايزة في مانايصا دار كساب يعني المعروف دار فلان دار، صار في ألفة كبيرة بين الناس وكل ما

يجي أبوي من السعودية ييجوا هالناس ويكون مع مع أبوي جايب كثير شغلوات أهمها التمر، وتمر السعودية معروف وكان أول ينحط بسطول، ولما تفتح السطل تلاقي القطر الدبس تبع التمر أكثر من التمر، قد ما إيش كان إيش زاي، نعطي هالناس وهاظا ويتعللوا، هاي فترة أول فترات أبوي، لحد ما تطور معه الوضع وصار تاجر ونروح علبنان وعسورية ويجيب جلود ويروح عالمصانع، آه هسه إحنا بنيجي للبدايات كانت رفيقتي أنا والشباب.

أحلام التميمي: [00:11:40]

هلاً، من مواليد الثلاثة وخمسين يعني لثلاثة وستين عشر سنين الخمس وستين اثنا عشر سنة شوي كان في حكي عن الفدائيين الخمسة وستين الستة وستين، بس شو كنت تسمع قبل ما اشتغلت مع الشباب كان يوصل حكي تسمع فيه، والله فدائيين بشتغلوا كذا، كيف كان للمحيط يتحدث عن هذا الجو؟

محمود طويط: [00:12:04]

أنا هسا إحنا وصلنا للخمسة وستين يعني خمسة وستين قبلها ثلاثة وستين أربعة وستين لسعودية، بعد ما أتت ما استقرت يعني وقفت إيش رحلاتي للسعودية مع بوي، هسع هون بالخمسة وستين للسته وستين، الرمثا وضعها حزبي وفيها نشاط حزبي، الإخوان الشيعيين البعثيين منطقة حدودية وقريب من درعا، والقوميين هذه كلها كانت موجودة وأهمها وإلي أكثر حراك وأكثر تطور ووعي، وفي يعني رجال معروفين يعني زي أبو ناصوح وزبي الهاريد والعماري وآخرين، طبغاً أنا فيما بعد كان إلى لقاءات معهم بعد ما أنا طلعت من السجن، هسة عنا بوسط الدراسة عندنا من زملائي كان أكثر شيء القوميين، آه حتى من شركاء أبوي إلهم أولاد وكان عندهم الفكر هاظ، هسة إلى السبعة وستين ها إلهي يعني عندك بالسبعة وستين، سووا دفاع مدني سووا وبالأحياء كلهم إيش استعداد للحرب وشغله زي هيك هاي قبل النكسة، فلما صارت الحرب واندلعت الحرب الكل كان متحفز وعنده إيش خلفيات لكن بدائية، كان في عندنا جارنا عضو البلدية وخلوه إيش من لجنة الدفاع المدني، يقول يا يا محمود فوتوا، أنا اسوي زامور، الحارة كلها تستنفر وهو ما عنده فهم، شو في؟ شو في؟ يقولوا هاظ محمود، يا محمود منشان الله يا زلة ما في إشي ما حداث بلغني، قلت له تدريب أبو غا، اندلعت الحرب وسوينا هالشبابيك بالأزرق وكله نيلي وشغلوات زي هيك.

أحلام التميمي: [00:14:23]

ليش الأزرق والنيلي إيش كان.

محمود طويط: [00:14:26]

منشان الطيران ما يجيوش، يعني هيك من ضمن هاظ كله نيلة منشان إيش تكون عتمة العدو ما يشوف إيش الأهداف، خاصة الأحياء السكنية، ما إنت بتعرفي اليهود شو أهم إشي عندهم يقتلوا الناس، هسه بعد السبعة وستين بدأ لجد، وبدأ الوعي يتجذر وكل الأحزاب تنشط، لأنه صار في انطلاقة وصار فيه إشي اسمه فدائيين، وصار في إنت لما تطلع باب الدار شو هاظ؟ هاظ فدائي، لحق ما صارت معركة الكرامة، معركة الكرامة ما فيش تلفزيون عند ابن عمي شو يا ابن عمي؟ تعال تعال اسمع في حرب هاي الجيش الأردني هاي في فدائية هاي، صرنا نسمع شوي شوي، هسع إيشي تجذر الوضع، كلنا بدنا نصير فدائيه، وكلنا بدنا نحارب، يعني ما هي أصلاً الرمثا مستغزة من الشغلات هاي مستغزة وذاكرتها مليئة بالمسائل هاي، هاظ المخ انتلى صار عنده حا حا يعني حد الإشباع، دارنا قريبة من المدرسة والسور واطي انط بالمدرسة وكل واحد معه خشبه ومسوي شنكل ومسمارين بواريد، صرنا نتدرب نتدرب إيش عبواريد خشب، إحنا بنسميه خشب باروده إيش شنكل، يعني هاي إطار ومدقوق هون مسمار وهون، بالملقط هيك تقول ولّا هو إيش طائر المسمار مسمار مطعوج منشان آه.

محمود طويط: [00:16:23]

صار يعني تطورت المسألة وأقول لأبوي أني بدني أروح أحارب اليهود، يقول لي اسمع إنت بعدك صغير بعدين أني بدني ياك تدرس وعمهل، والله يابا حابب إيش أسجل، يقول لي ويه بعدنا ما شفنكش، آه أبوي يعني زي ما تقول عنده أسلوب آه عنده أسلوب لكن إيش حاد لما إيش تصل مرحلة زي ما تقول بدني إياك تدرس أهم إشي تدرس، أقول له طيب مشيت الأمور شوي شوي إجت مرحلة الثالثة إعدادي دراسة الثالث إعدادي، ثالث إعدادي هاظ مصيري عندنا زي التوجيهي ومترك اسمه مترك، ويتقدم بعلامات إيش مميزة وبطلع اسمك بالراديو إنك ناجح ولّا مش ناجح، أبوي إيش في السعودية قال اسمع اذا بتسقط شايف البير قديش غميقة بدلك بدليك فيه، لا بنجح يابا يقول مش شايف إقرأ، وإذا بتنجح إلك هدية مفاتش عالرمثا، قلنا توكلنا على الله، أصحابي يقولوا بدنا إيش نطلع ندرس نمشي مسافات يعني نمشي من الرمثا وين بدنا نروح عالطرة إشي شغلة هيك كل القرى إلي جنبنا، وإحنا منطقة حدودية ممكن إيش تطلع نصل الجبال إلي بيننا وبين سورية مش طبغًا.

محمود طويط: [00:18:01]

مرة من المرات قالوا يالله بدنا نروح بلكي رحنا عطرة، بيحي عشر شباب هسه دكاترة كلهم مهندسين، مشينا لقينا جدي جاي من بعيد ومعه حمار ومركب إيش هالغرضة عليه، وبين رايحين أبو أمي طبغًا هاظ، لأنه أبو أبو أبوي ما عشت معه يعني ما لحقته كان متوفي، مشينا

إيه صارت الدنيا العصر المغرب إحنا بصراحة مش عارفين وين بنروح، ولّا إحنا عشيك قولوا هاي الشجرة بعد الشجرة هون سورية، قلنا تنفوت فتننا ولّا وين إحنا بالزيريب الزيريب هاي منطقة سورية وفيها بحرة كبيرة، والله قلنا تنروح نشوف هالبحرة رحنا ولّا في زوارق وهذا كله خشبية طبغًا من أيام أول، ركبنا في واحد من أصحابي قال والله بدي أنزل باليّه ضرب راس وين الزلّة ما طلّعش وك فروا كفاروا مش ولّه هو طالع يم كله راسه أسود أسود من الطمي راح ما يموت، المهم طلّع واطلعناه وطلّعنا عهالشط قعدنا، بدنا نوكل ما فاش أكل، في واحد من أصحابي اسمه فايز الله يرحمه كان محامي ومات، قال أنا معي فرنكات سورية رحنا اشترينا تمر بلح أصفر وأكلناه، قلنا يا الله بدنا نروح إحنا ما بندري شو في إشي بالرمثا وشلون فيّه، بعد المغرب صارت الدنيا إيه، برضو نمشي نمشي نمشي، ولّا هي الرمثا مقلوبة قلب، وين الولاد؟ وصلنا بالسلامة اتبهدلنا قلناهم إيه إحنا بدنا نقرا بدنا ننجح، قالوا يا الله تعالوا هاي المرحلة يعني المراحل إليّ كنا. غير في كان إلي صاحب اسمه محمد عبد القادر المشارفي، هاظا وين دارهم عند الجمرك ويعني ما فيش مسافة كبيرة عسورية، كنت أظن هناك ونطلع عهالجبال برضو نقرا، إجت نتائج الامتحانات وكل واحد هالراديو قدامه، كلنا بدار عمي موسى مكش عندنا راديو وهمه عندهم راديو، اسمع اسمع إيه نفقنا ما فيش حدا، ولّا بيقول محمود إبراهيم محمود، إح قلنا الحمد لله في ناس.

أحلام التميمي: [00:20:42]  
كان فترة المترك إما ناجح أو راسب أو علامات؟

محمود طويط: [00:20:46]  
ناجح يا ناجح يا أنت الله يعوض، كان أصحابي شاطرين وأكثر مني أشطر يعني بعلم، ويدرسوا اربع وعشرين ساعة من أربع وعشرين ساعة، يقولوا فلان سقط إيه، تفاجئ كل الرمثا تفاجئت، هذول إليّ قرابتهم شوي وهي يعني ودائمًا إيش حركين وبلعبوا أكثر ما يدرسوا نجحو وفرحان الله يرحمه، عكل حال هو كان طبيب يعني نجح وصار طبيب دكتور توفي هسه رسب، إيه تفاجأنا المهم حليناه وكذا، وصلنا فرحان الله يرحمه طبغًا بعديها واصل وصار دكتور وخلف وأولاد إيش ما شاء الله عنهم وتوفي، هاي محطة من المحطات التوجيهي كان إلي المترك كان له رهبة، يعني شلون التوجيهي حاليًا نفس الإشي لكن شلون؟ ببساطة الفلاحين، ابني بده ينجح ابني مش عارف إيش بس لا يحتشدوا ويروحوا بالمدارس ما بستجروش ليش؟ لأنه هناك كان في تشديد بالمدارس، وكل واحد هو وجهده لا بتقدر تغش ولا أبوك بيغي يفزعلك ولا قرابيك باب الدار، فش مترك يعني مترك والأساتذة صارمين، وقادرين بنفس الوقت قادرين، وبالشرح بتستوعب منهم ليش؟ لأنه بدأ معك بالمدسة بنجيب بريق الوضوء وتوضأ بل بالساحة وصلي، لشلون

العبرية با بدر حا حصد ها يعني إيش بيدأ معك بالتدريج، ولا يمكن بيدأ من حصة لحصة إلا تكون فاهم يعني كان في تجديد كثير وكلها قامات يعني معروف، الاستاذ خالد الشرع الاستاذ الملازمة وقاسم خصاونة وجميل بيضون، يعني كلها أسماء معروفة ولامعة وعلي عزايزة محد سمارة كلهم هذول معروفين، وكلهم بدهم يدرسوا ليش؟ لأنه كانوا يعتبروا التدريس إشي أساسي وأمان. هاي إيش بالنسبة للدراسة، طبغًا.

أحلام التميمي: [00:23:11]

نجحت سمعوا بالراديو أنك نجحت كيف جو العيلة الفرحة إلي كانت؟

محمود طويط: [00:23:15]

هي كلها الجيران إعمامنا إخواننا كلهم إجوا طبغًا الأم هي إلي أكثر وحدة.

أحلام التميمي: [00:23:28]

إيش حلت شو وزعت؟

محمود طويط: [00:23:31]

شو بدنا نوزع مخشرم وكعكبان، يعني كان بيحي من سورية حبات هيك حلو بيض ومشخرمات هاي فيها إيش جوى حمصه، بتقدروا تسموها جوم بتقدروا مشخ مشخ يعني هيك الأسماء كانت، والكعكبان طبغًا قطع حلو، في خط أحمر وخط أبيض وخط أحمر هاظا اسمه كعكبان، آه وكان تيجي راحة طرية هاي معظمها كانت تيجي من سورية، لأن الخط بيننا وبين درعا مفتوح، والشوام شاطرين بالشغلات هاي، الفرحة هاي طبغًا كانت حافز، لكن خيلنا نوخذ جوانب أخرى شلون إحنا طيب ندرس بس يعني وقت الدوام دوام وبعد وقت الدوام شو بتسووا؟ كان في إشي أساسي عندنا، نطلع من المدرسة ونظل رايعين وين عالشلالة، هاي الشلالة مصيف، نبع جاري ويقال إنه من مئات الكيلومترات جاي تحت الأرض من سورية والكل بروح.

أحلام التميمي: [00:24:43]

من سورية بتوصل الرمثا.

محمود طويط: [00:24:45]

الأرض من تحت الأرض يعني تحت الأرض، يصل الشلالة طبغًا فيها نبع ولحد الآن الكل بزوروه شوفي حواليه زارعين عاد للمزارعين تين أهم إشي التين، وتين الشلالة موصوف يعني تروح عالشلالة معناته أنت بدك تسبح بالبرك وتتعلم السباحة أو تفشل بالسباحة وتلقط تين وتروح عدار أبو هضيب وتروح عالدار الربايح كلهم هذول إيش إلهم أملاكهم، مع أنه إيش لازم تطور الشلالة كثير، يعني هاي لو ببلد ثانية تعتبر مركز أساسي للزيارة وبجيب دخل، طبغًا هسة بالأيام هاي في حركة صار شاليهات وما شاليهات وشغلات زي هيك، لكن إحنا بنحكي أيام أول، وشلون نروح عالشلالة؟ حقه يعني حقه يعني بلا كندرة بلا إشي فش يعني في فقر كان كمان بدك الصحيح كان في فقر، حتى نلعب فطبول أنا كنت مدلل بالدار مع أولاد الحارة، كنا نلعب أول إشي فطبول شرايط كرة شريطة ونلعب طبغًا حقه كمان يروح ظفرك ينجرح أصبعك عادي، بس إيش الرياضة خاصة كرة القدم بالرثا من الصغر أساسية، يعني الرمثا بتخرج كل أندية الأردن هسة فيها رماتنة فيها لاعبين طبغًا.

محمود طويط: [00:26:20]

نمارس الرياضة حارات نطلع يعني الحارات مثلًا إحناحارتنا، أنا واقع وسط مين العزايزة والداهود والمنايصة، كلهم هظولا إيش من نفس محيطنا، دارنا طبغًا لصيقة للمدرسة والملاعب بالمدرسة بس انط هيك الكل يتجمع، نسوي مباريات بين الجميع مثلًا إحنا الفريق هاض تبع حارتنا يروح يباري إلي في الجملة، الجملة بعيدة شوي في أكثر بو، إشي هناك في رعيان ساكنين حوالي الدود، إلي هـ الداود إشي أساسي هناك بالمنطقة، بذكر أنه إيش رحنا المباراة طلعتنا طبغًا إحنا كنا شاطرين فريقنا إيش شاطر، غلبنا إيش الداود، هسه بدهم يثاروا شلون بساواوا؟ بدهم يلحقونا بالحجار، طبغًا استنجدوا بالبدو وهذولاك ضريبة حجار، صرنا نتراجد عبعض، وصلنا لأطراف العزايزة العزايزة في يعني معرفة بناتنا، طلعت أمة للشبب ورفعت الراية، شوفي شلون إيه تفكير أول يعني، يعني حتى بأيام أول فرعة وإحنا ما مع الفريق هاضا ومع الفريق هاضا، المهم صار صلح بيننا وتصالحنا، يعني هاضا كله وقتي يصير ليش؟ لأنه الظروف فظيع بالرمثا يعني أنك تنغلب إشي كثير صعب تنغلب، فكان كر وفر وفر، لكن تلاقي كل الحارات في الرمثا على البيادر وين ما كان كله كرة قدم شرايط.

محمود طويط: [00:28:04]

تطورت الأمور، صار في طبل فطابيل في فطبول زي هيك مطاط، بس هاض ما بخدم إشي أسبوع ولا منفجر، الشباب منشان الله قول لأبوك، أبوي يقول لي يا زلة هذيك اليوم اشتريتلكوا فطبول، يابا معلش والله والله مهو يعني أصحابي أصحابي، مرات أقول له ليننا من بعض ما بصدقش، يقول هاك يالله روح اشترى فطبول، تلاقي أنا الممول الرئيسي للحارة

بالفطابيل، وبنفسي إلا أتي أنا بلعب فهياي كانت إيش معروفة بالرمثا فطول يعني الكل، أكثر إشي كنا ينروح عالشلالة أميت؟ لماذا يكون عندنا امتحانات وها يوم جمعة، يوم جمعة عطل وما في كان عطل إلا يوم إلي هو يوم الجمعة، يعني سبت إشي زي الأيام هياي كان في دوام، نروح عالشلال نطل للمغرب، نوكل فيه نسبح وكثير ناس إيش تعلموا السباحة بشكل جيد، ما عدا أنا، كان عندي رفاق بالمسألة هياي، المهم نلعب بالحووز ما وعيد حالي ووي غرقان، شلوني هالشباب صار عندي عقدة من الس، هسة بروح رحلات، كمان أنا يعني بقوم رحلات لكل الشباب. بينجي إيش فيما بعد بنحكي عنها.

محمود طويط: [00:29:27]

هياي إيش في موسم الحصيدا موسم الحصيدا ما نقبلش نطل قاعدين بالدور، نروح نصير نحصد مع المزارعين، تحصد كرسنة كان في كرسنة أيام أول، الكرسنة هياي للغنم وللدواب، وفي شعير وقمح وكل المسائل هياي كانت موجودة وعدس، يعني كان عندنا دورة زراعية برالرمثا عدس كرسنة شعير قمح هطول أساسيات، وتزحف وتحصد يعني في الحصيدا عالأيدين وفي بالمنجل بتعرفون شو هو المنجل، آه طب يعني شلون إنتوا طلاب مدارس تروحون؟ نقول آه مش عيب! كان الحاج خلف الياسين هاظا تزوج خالتي وهي صغيرة وعمره سبعين ثمانين سنة، وخلف منها عشرة دكاترة ومهندسين، آه كان عادي هياي المسائل لأنه كان في بدل وما بدل وشغلات زي هيك، أمي تجوزت بدل أبوي لأنه عمتي راحت مع خالي وعمتي اسمها مريم ترى، يعني كل الأسماء هياي إلي بسميلك ياها كلها إلها معاني، ورمثاوية فاطمة يعني زي ما تقول كله إله ناحية دينية وعقائدية، لأنه كل الناس إيش؟ عندها دين أهم إشي كانوا متشددين، هياي.

أحلام التميمي: [00:30:58]

الآن بس نجحت بالترك إيش صار خلاك أبوك تكمل تعليمك أو شو الوضع؟

محمود طويط: [00:31:05]

إلي صار وصل الخبر السعودية إجي أبوي جاب الهدية إلي فش منها بالرمثا.

أحلام التميمي: [00:31:15]

ولي هي؟

محمود طويط: [00:31:15]

راديو ساعة راديو ما كان عندنا بالرمثا ساعة راديو، وكبيرة وميناها أزرق، هاي إلها محطات الساعة.

أحلام التميمي: [00:31:28]  
إلّي هنتّه؟

محمود طويط: [00:31:30]  
بيجيها دور، لأنه إيش لّا صرت فدائي.

أحلام التميمي: [00:31:37]  
تمام بنحكي عنها معناته.

محمود طويط: [00:31:39]

طيب، هسة هون إحنا نجحنا قبل لا نحكي شو صار بعديها، لأنه بعد النجاح بده يكون معادلات ومفروض أنت صناعي تجاري علمي أدبي، كله هاظا إيش يفرز أوتوماتيكيا من عندهم، مش أوتوماتيكيا يعني بالإيد بس إيش من عندهم مش أنت إلّي بتحدده، آه الثالث إعدادي، وخاصة زي ما تقول في وزارة التربية والتعليم إحنا تابعين إلها وين؟ بإريد، إريد عند الساعة دوار الساعة، كان هناك بأيام أول لّا كانت الأماكن ضيقة، طيب هسة في جوانب أخرى غير الحصيد، كان في عندنا اجتهادات يعني المدارس كانت توخذنا رحلات، وبين الرحلات بالباصات أيام باصات الإخ، الخديوي يعني هاي كانت إيش هي الموجودة قديمة كثير، عالعبقة! كنا نروح عاد العبقة ووين نسكن؟ بالمدارس! بالمدارس هناك وينزلوا عالبحر ومن هون ومن هون، أنا بحب التصوير كان عندي كاميرا كوداك، طبعا أفلام وتروح تحووط، تحمضها وين؟ عند المصور كنت أصور كثير وبجوز لحد الآن في عندي صور من هذيك الأيام، لّا بالعبقة هناك صرت تختلط مع ناس فيما بعد، مثلا الجامعة الأردنية يودوا إيش طلاب وطالبات، ونزل بالسباحة وهاظ نختلط مع بعض تعالوا رماثته تعالوا بدنا نشوف شلون غنانيكوا، رماثته بدنا نشوف رقصوا، آها كنت حرك آني بهذيك الأيام، يجبروني يحطولي هالسلك الأحمر هون ونصير إيه نرقص قدامهم، يتحرفنوا صار عندنا وعي أكثر، لأنه الجامعة الأردنية طبعا لّا بتوصل جامعة وهذيك الأيام بصير زي هيك، يعني إشي مخك منكون إيه بعده بده يتأقلم، تفهمبس بعد ما تروّح تفكر شو هاظ قال؟ إشو جوّه السياسي؟ شو هدفه؟ شو منطلقه؟ من ناحية حزبية طبعا آني بحكيلك ليش؟ لأنه قلت لك إنه في إيش، الوعي بالرمثا كانت إيش ناضج كثير أكثر من أي منطقة، لأن في تماس وما

تماس، وفي شغلات كثير كانوا يدرسوا بسورية والجامعات وييجوا يسولفون مع بعض، مش يسولفولي أنا، يسولفون مع بعض.

محمود طويط: [00:34:30]

تصير تحكي شو يعني؟ شو معناة حزب بعث شو معناة يعني جامعة شو قوميين شو فدائيين شو كذا، شو هذول بحكوا وين عايشين هاي التجربة شوفي، فتولد كمان عندك نوع من النضج السياسي والوطني، هسع إحنا وصلنا وين بعض الجوانب قبل لنطلع منها نشوف طبيعة العلاقة بين الناس إحنا كنا، نلاقي يوم الخميس تعال يمه خذ هالطنجرة هاي روح وديها هاي، لحوالك لعمامك لكذا، آذان الشايب كباب لزاقيات زقاليط، هاكل هيكل أكلا من زمان، فكان هاي إلها أثر يعني، شلون أنت بتنسج العلاقات تروح من حارة لحارة ليش؟ منشان تؤدي واجب! ما بصير يمه بالخميسيه ما نوديش؟ الأعياد نفس الإشي.

أحلام التميمي: [00:35:29]

إيش الخماسية؟

محمود طويط: [00:35:31]

يعني يوم الخميس بطولك أجراءً توزع، تروح تودي لحواتك لعمامك لخالتك إحنا بنسموها العناية، يعني عنايتك يعني بتخصك، يعني أنت ملزم تروح تودي لها، ومين إلي بقوم بالدور؟ أمك هي الحنونة هي إلي بتعرف، لأن الأبوا ما يكون بالدار، يا إما بحيفا يا بيافا يا بالسعودية يا بدرعا يا بحصد، لأنه إحنا مجتمعا ذكوري وإلي بجيب الأكل الأب، لكن ما بعنيش إنها ما بتروحش تساعد! أمي كانت عند جدي تروح تقود الجمل وتجيب ترحد شو ترحد يعني بحصدوا، هسع بسووه غماير، الغمر يعني إيش قش بلفوه مع بعض، أو عدس أو قمح أو شعير يجيبوا هالجمل ويركبوا عليه، مين يقود الجمل أمي تجيب للرمثا من السهل، كان أبوي جدي يعتمد عليها كثير بالزمانات، وكل النسوان يعني مش بس هي، هي كانت بنت بعدها طبعا بس هي كانت تسولفلنا شو تساوي، طبعا هناك بقولك والله أطعمنا شو أطعامنا؟ مزنة! كانوا إيش شو المزنة؟ راس بصل أخضر وخبز، تشاوية سندويش، إلي الله منعم ومتفضل عليه، يوخذ أصابع حلاوة، كانت تيجي من سورية إصبع مستطيل وملفوف بورقة ذهبية، هاظا إصبع اسمه أصبع حلاوة، هاظا أكل الحصادين، أو تمره أو بلح ييجي من سوريه برضو بلح هاظا الأكل.

محمود طويط: [00:37:46]

طبعًا غير الي الي كانت يعني مس مشكلة صعبة أيام أول خاصة بالدور، مهمة الي مش لعند أبوي إمي، الأم كانت هي الأساس بالدار عندهم سطل أو إشي زي هيك وروحوا عالمحاي، المحاي عندنا بالرمثا نبع مي، الكل يروح يعني ويجيب، يجيب سطل سطلين إن زادت، ولازم أنت تتكيف فيه طول اليوم كل الأسرة، هاظا كله مهمة أمك، لأن بدها تغسلك وبدها دق إيه إيه تطبخ لك بدك تشرب هاظا الأساس، بعدين فيما بعد إنعدوا من سورية صاروا يجيبوا إيش زير خابية يعني بس الزير خابية كبيرة تنحط، وإيش كل واحد بهالكاسة يشرب ويرجع الكاسة يشرب وير، هاظا الأساس ما في حنفيات ما في دشات ما فيش إشي يعني إحنا المحا.

أحلام التميمي: [00:38:52]

الكاسة الستانلس ستانلس ستيل كانت إلّي مع الخابية كالاسة ولا إي كاسة عادية؟

محمود طويط: [00:39:01]

هاظا الستانلس ستيل إيه يعني هاظا الساتا إل إل إيه الكاس إلّي بتحكي عنه هاظا فيما بعد.

أحلام التميمي: [00:39:09]

أمم.

محمود طويط: [00:39:09]

كان في شمع شمع يعني بالكاسة شمع.

أحلام التميمي: [00:39:13]

آه.

محمود طويط: [00:39:13]

عأيام أول، طبعًا إحنا عندنا مصدرين فيهن مي بالرمثا كانن، المحاي وإلّي الكل بيرده منشان يشرب ويوكل ويشرب، والشلالة منشان التنزه وتروح تسبح بهالبرك إلّي مسوينها، هاي إيش بالنسبة للمي. كان هفي كمان أمي بتقول مكانش عندنا جاج شو أسوي بدي أروح أشتري بيض إلكوا شو أشتري بيض، مكانتش بيض تبيض، بودرة البيض! أكياس فيهن إيش بودرة البيض، يعني الصفار تشتري بقرش قرش ونصف وتلخ بالمئة وتقلية، فيما بعد طبعًا صار عندنا جاج ونوكل بيض، بس هاي مادة أساسية كانت البيض إلّي هو البودرة، وفي عندنا الراحة المحشية هاي كمان كمان بوخذوها للحصادين، الراحة المحشية بتيجي بصطا بصوت نصية

سطلية يعني وفيها صفوف صفوف، يعني من أول من إل إيه من الطرف للطرف بيحي يعني ثلاثين سانتي طولها، هاي الراحة المحشية كانت موجودة، وعقال الشايب هاظا كله من سورية، عقال الشايب معروف شو باقيه هي، وإذا بتعرفيهوش شو هو؟ لا يجوز ما بتعرفيش عقال الشايب؟ آه زي مزاريب خمسة عشر أو عشرين سانتي خمسة عشر وبنصفهن جنب بعض، هاظا عبارة عن شعيرية ومحشية إيش؟ بندق ولوز وشغلات هذي موجودة كان بسورية وعليها قطر، تلاقى القطر أكثر من الهذلاك، بس لما تفتحي النصية يعني بتحتاري شو بدك توكلوه، زاكي زاكي كثير كثير يعني، مش إلي موجود هسة، هظاك أول كان إيش أصلي ما حداش يغش، هاظا إحنا نسميه إلي هو عقال الشايب وسطالي الراحة هاظا كله من سورية، في هناك مصانع كثير وهم والشوام شاطرين بالشغلات هاي.

محمود طويط: [00:41:25]

داخل آخر زي ما قلت لك هالي عنده حاكورة أو من البيدر، كمان في عندنا كان أيام أول البراك شو البراك هذي؟ كون نكون مقعدين حالنا بعد إيش المحصول مثلاً قمح، جدي كان كان يدرس طبغاً، في عنده كثير زراعة وقاعة هالدار يفرد هالقمح وفي لوح خشب ولوح الخشب من تحت في حجارة، ونسيبه عنده دابة يعني حسان أو بغل أو هاظ، ويصير يلف يلف ونقعد إحنا عاللوح منشان يثقل اللوح ويدرس القمحات، بعد الدراسة هاي شو بصير؟ في شوايعب، بيحي يصير يذري يصير التبن لحال والقمح يظل لحاله، يخلص آه جدي جدي وله، شو بدك إنت وإياه، قلناله بدنا البراك، كل واحد يقظب حاله هيك، يا الله يحط له عرام وعرامين، ونروح نبيعهن لليس للدكاكين، منشان نشترى راحة محشية وعقال الشايب وشغلات زي هيك، أو مطعم وحلو وشغلات زي هيك، هاي اسمهن بركة كل واحد يستنى تيصير يعني صاحب الملك يذري ويصفي وتروح تتبارك، طبغاً كان إيش يعني مثلاً إلي يجيه مغاميق يحطله غمقان هاظ لبنته الفلانية وغمقان هاظ لبنته الفلانية.

محمود طويط: [00:43:00]

غير هيك في سداد بكون هو قبل هاظ ماخذ من الدكاكين وامتدين، أميت تسدنس يا إبراهيم؟ عالبيدر إحي البيدر بروح بحمله شوال شوالين بقول له وژن، قديش صارلك عندي شو بظلني عندك شو بظلك عندي، هاي هيك يعني السلعة مقابل السلعة، لأنه ما فيش مصاري هذي الأيام في طفر، يعني هاي إيش بدناش نتطرق الماركيفيه هاي إلي هو وين ما تلاقى سلعة بتوخدها، لأ هاي إحنا من هون موجودة يعني هاي بضاعة بينية تجارة بينية، ها السلعة مقابل السلعة، معك مش مصاري مش فلوس، ولا مجيدية ولا عثمانية ولا شغلات زي هيك، طبغاً الرمثا كمان تأثرت أيام الأتراك تلاقى هسه كثير من الرمثانة خدموا بالجيش، وبعرفوا تركي وكذا

وكذا، وبصيروا يسولفوا لك أنه هاي الرمنا كلها كانت شجر وكلها غابات أيام الحرب مع تركيا كانوا يقصوا الشجر مشان يغذوا القطارات لأنه القطارات كانت إيش عالخطب، آه يعني كله هاظا منشان يمشي القطارات، فصار صحوة بالرمنا فيما بعد صاروا يشجروا، بس عالموضة الناس شو مشجر هسة أكثر إشي، يقول لك أنا أروح أزرع سيرو شو بدي في السرو! زيتون، زيتون، زيتون مساحات واسعة بزيتون زيتون لأنه مادة أساسية الزيتون، ها وبدهم يعوضوا ففي صحوة حاليًا بالرمنا بمنطقتنا، أنا عندي بيجي ألف ومئتين شجرة زيتون، وهاظ بعد ما طلعت من السجن وصرت، بدك تضحكي آني أول ما طلعت من السجن قال لي أبوي تعال أقول لك، إنت صارلك إحدى عشر اثني عشر سنة بتعرفش حدا شلون بدك تعيد علاقاتك مع الناس، دارنا القديمة بدي أفتح لك دكانه سنة أو سنتين عييل لا تتعرف عالناس، وتروح تسعة عشر سنة.

محمود طويط: [00:45:12]

يعني حاليًا أنت بتتذكر شو بدك تتذكر كلها علاقات طيبة علاقات صداقة، إيه تروح هالناس عند بعض تقعد عند بعض نتعلم شلون نتعلم يعني عشمعة أو سراج الكاز، آه يعني أبوي يا بيجي أقول له بابا بالله يصير زلة، يقول لي اكتب سبعة وسبعين هاي عالسراج سبعة وسبعين تيجي مش هيك، إيه يقول لي لأ هاي مش سبعة وسبعين، بدي سبعة وسبعين واحد اثنين واحد اثنين يظل نص ساعة عيين إيش مع كتلة عيين لا إيش أتقنها، يعني كان برضو أبوي يساعدي كثير بالدراسة، بذكر إنه يوم من الأيام بالعربي الثاني أو الثالث إعدادي كان مدرسنا تركي الحداد نسخنا إملاء، جبت تسعة وتسعين صرت أعيط، يقول لي يا زم مالك الشباب، يقولهم لأ الاستاذ هاظا لحكي صحيح لأنه هاظ دايمًا مئة شلون تسعة وتسعين، فكان في تشديد عالدراسة أيام أول يعني كان الواحد بشعر إنه بتلقى درس بستفيد المعلم مخلص، بصير إشي ثاني تنضرب على إيديك من هون بالعصا من الأستاذ، حدا بقدر يقول له إيه بقول للاستاذ ليش ضربت ابني؟ لا، وما تقدرش إنت تمشي بالشارع تشوف الأستاذ من هناك وتظل ماشي تفل من الشارع الثاني، إله هيبة إله قيمة.

محمود طويط: [00:46:47]

اثنين مرات أنت لما تشوف الصف إلي أعلى منك يعني أنا مثلصا بالرابع تشوف الخامس وسادس ما تصدقش، أكبر منك بكثير بالشكل شوارب شو هاظ، يقولوا هاظ كان يسقط كان يسقط كان يرسب، يعني ما بتنجح بالسهولة، لو بتظل خمسة سنين وأنت ترسب بدك تظل تقرأ، فش إلك بالدار إيش، ما ما روح روح عبال ما تنجح، فكانت أيام حلوة كثير أيام معاناة طفر، تمشي حافي إيه ما عندكيش إلا إيش هالشبشب أو ما عندكيش من مرة بنطلون واحد

قميص واحد ويجوز يكون من البالة، كان في زي أيام أول باله وكانوا يوزعوا علينا الحكومة يوزعوا بقج، البقجة شو هاي يعني صرة وفيها كل أنواع إل إيه الشغلات المستعملة، تيشيرتات كذا كذا، كله طبغًا بيحي إعانات من برة هاظ، كانوا يوزعوا تلبس هلي موجود.

محمود طويط: [00:47:55]

طيب هسع إحنا بعد ما أخذنا جوانب معينة شو الرمثا إلي هي بتعتبر يعني، الرمثا إيه تعتبر منطقة حولة حوران وهي المشهورة بإيش بالزراعة، وهي السلة السلة الغلة والسلة تبعت مين تبعت الرمثا وتبعت السهل سهل حوران من أيام أول، يعني امتداد الرمثا في إربد في عجلون في عندك درعا كل المنطقة هاي اسمها سهل حوران وهي كانت مصدر للأتراك إلي يوخذوا منها الغلة، ها يعني خيراتها كثيرة مع الأسف هسة شو في؟ في ارتداد عن الشغلات هاي، يعني صار في كمان شغلات ثانية إنه الحركة العمرانية أكلت الأراضي، لكن الحمد لله هسا في صحيان، إيه في عندك ميّه في عندك أبار إرتوازية، في عندك مشاريع بطاطا فاصوليا كل أنواع الخضار ول إلي موجودة تزرع حاليًا بالرمثا طبغًا همّه ويه ترأسوها باكستانية لكن إيش امتدت للرمثانة وللسوريين خاصة بعد النزوح هاظ، صار الكل بتنافس يعني هسا ممولّ أساسي الرمثا بندورة خيار بطاطا فاصوليا بيتنجان وين ما تروحي بتلاقي، يعني حتى وأنا بروح على أرضي بتلاقي من هون ومن هون كله زراعة، فالحمد لله يعني إيش في صحوة لكن مش بالدرجة المطلوبة، لأنه حاليًا في كثافة سكانية في في يعني ناس بدها دخل، يعني هالشباب معظمهم قاعدين، بتخرجوا من الجامعة بس بليقيش إلهم شغل، إيه بتخرج من يعني وضع كل الموجودين حاليًا لازم يشتغلوا، طيب ليش أنت ما بتشتغلش بالزراعة؟ ليش أنت ما بتكون من ضمن هالمشاريع؟ لازم مكنتي مكنتي طبغًا هاظا غلط، يعني حتى ابني مثلاً المهندس إيه، هندسة اتصالات صار له خمس سنين مفيش إله وظيفة، بس أنا وإحنا نشغل مالحو جبته عندي وتخرج من عندي، حاليًا بطلع طلبيات بسوي كنافة يعني يسلك حاله عبال ما يشتغل، اثنين كل ما تناديه مؤسسة من شركة الاتصالات بروح شهر شهر ونص شهرين لما يخلص العطاء بقولوا له روج، برجع عندي عهالحل ها بشتغل، يعني المفروض أنه أنت العقل والجسد يكون شغال، حصّلت على درجة معينة من العلم لازم توازي جهدك العضلي، بيحي يشتغل بطلع بشيل سدور بنزل سدور سفوا للغاز بطبخ كنافة هاظ بيحمدوا فيك طيب، لأنه أنت شوف الأردن قديش فيها قديش فيها تخريج خريجين كل سنة فيها خريجين، إذا شلون الأردن يعني الحكومة بتسوي وظائف لكل هظول؟ مستحيل إذصا لازم تنتج لازم تشتغل، ها صار هون دعوة للشباب إنهم كلهم يكونوا قدر المسؤولية وهمّ بينوا هاظا الصرح.

أحلام التميمي: [00:51:27]

صحيح تمام نرجع أنه أنت تخرجت من المترك وصار الاحتفال وما إلى ذلك، المرحلة إلي بعدها  
إيش صار معك؟

محمود طويط: [00:51:37]  
الثورة.

أحلام التميمي: [00:51:38]  
بدنا نحكي عنها.

محمود طويط: [00:51:41]  
هسة هون، لما إيش طلعت النتائج، أني بهديك الفترة قلت أنا بديش أدرس، أنا دا، بدنا نسجل  
فدائي، صرنا نروح عالمكاتب ويقولوا يا عمي أول إشي إنتوا روحوا أدرسوا كملوا دراسة.

أحلام التميمي: [00:52:03]  
إيش هاي المكاتب؟

محمود طويط: [00:52:06]  
فدائية مكانت بالتسعة وستين ملانه، ها وهون طبغًا الواحد رايد بهالأثناء، رحنا عايرد ما  
قبلوش رحنا، يا عمي خالص آني بدي أصير يا عمي روح أدرس، كان في واحد من المكاتب الله  
يرحمه استشهد اسمه سالم يقول لي تعال يا محمود.

أحلام التميمي: [00:52:27]  
إيش اسمه؟

محمود طويط: [00:52:27]  
سالم.

أحلام التميمي: [00:52:28]  
سالم إيش؟

محمود طويط: [00:52:31]

مهو كله كان أيام هذي أسامي حركية، إمم روح وادرس مستقبلك مليح وأنت شاطر وبعدين هي الثورة طويلة، طيب أنا وصاحب لي كان هاظ دايمًا يقول هسه طيني، ولا شو بدي أسوي شو بدي أسوي شو بدي أسوي؟ قالوا في بالشويط مدرسة زراعية، أبوي يقول لي مالك شو في؟ قلت له بتعرف بابا شو رأيك أروح أدرس زراعة زراعة وبصير إيه بطلع بفتح مزرعة وبصير، أبوي ما بدوش بده ياني علمي بده ياني دكتور، قلت له صبرك شوي، المهم رح عمديرية التربية وين بإريد، قلت لهم شو تخصصات شو في؟ قالوا والله بنصحك تروح عالزراعة بشوبك وهييك هييك هييك وبتنيسط هناك وداخلية عالطراز الأمريكي وكذا وكذا، قلت آه تشوف والله إجي القبول، قلت للأبوي هييك هييك قال بدي أروح معك، هاي وين بدك تروح وعمان ومن عمان تطلع عالوحدات والوحدات هناك في الكراج إلي بروح عالجنوب وتروح إيش عالشوبك، طلعا آني عارف شو إلي بدي ياه وأبوي بتعرف شو بدي إياه.

محمود طويط: [00:53:59]

ركبنا بالسيارة ومشينا ويبدأ السوالف يا حبيبي، وفي هييك فدائية وترى يتصير هييك، أبوي شو بده يساوي، قالك هييك هاظا الولد ما جابني لهون إلا في إشي، قلت له بابا طوّل بالك ما في، وصلنا الشوبك ولقيت في بالشوبك هناك أربعة رماثة من بلدي، إجوا سلموا علينا طلع واحد منهم، أب أبوه هو رفقة هو وأبوي، شلونكوا شلون ها، قال إلهم إشو في هون؟ أبوي ذكي، صاروا يسولفوله قال هاظا الولد ضاحك علي، هاظا مش جاي يقرا هاظا بده يروح يحارب، قاللهم إشو في؟ قالوا له خلص عاد إلي بده يقرا بقرا وإلي ما بدوش يقرا ما، قال ديروا بالكم عليه، وودعني أبوي ورؤح.

محمود طويط: [00:54:59]

حسه المدرسة خليط فتح وإخوان والباقي خامات للاستقطاب، أول ما هجموا علي إيش المتدينين، يعني من إيه من دار الهدومي بقول لي أنا كذا كذا كذا، وشو أفكارك شو؟ قلت له أنا حاب أستشهد، قال خلص، شو إنت؟ عرفت أنه إخوان مسلمين وكذا، قلت توكلنا على الله، طبعًا هسه في الدراسة هناك العلاقات الإجتماعية أربع خمس تيّام صار الكل بده يمشي مع طويط، الكل إيه أنا اجتماعي كثير رياضي كذا كذا كذا، وفريق المدرسة بصورته وكذا، وهذول الشباب الرماثة نمشي معهم هي وينهوني كذا، مخشش معهم، أسبوع أسبوعين ثلاثة خمسة، قلت له يعني شو هالنشاطات شو، قال بدنا نكتب للجامعة الأردنية وأن التنظيم هناك وهاظا منشان نطل نتواصل معهم، قلت له طيب صرت أكتب أنا بعرف أكتب وعندي أسلوب كذا كذا وكذا، وصاروا يودونا من الجامعة الأردنية النشرات وكذا وشو المطلوب، قلت له وبعدين.

أحلام التميمي: [00:56:24]  
شو اسمه كان إل إيه الشاب هذا إلّي عم تحكي معه؟

محمود طويط: [00:56:29]  
القدومي مهو بي آه، من دار القدومي من القدس خاف الله.

أحلام التميمي: [00:56:35]  
نعم.

محمود طويط: [00:56:35]  
إيه قال لي والله.

أحلام التميمي: [00:56:36]  
هو من تنظيم من حركة فتح.

محمود طويط: [00:56:39]  
إيه لأ.

أحلام التميمي: [00:56:40]  
لأ هذا الإخوان.

محمود طويط: [00:56:40]  
آه.

أحلام التميمي: [00:56:41]  
نعم.

محمود طويط: [00:56:41]  
بعدنا مجيناش عفتح.

أحلام التميمي: [00:56:41]  
نعم.

محمود طويط: [00:56:41]  
المهم قتلوا في عمليات يعني؟ قال والله أحكي لك بصراحة، قلت له شكرًا هيك، قلت له أنا بالتنظير والشغلات هاي بعرف كل إشي، أنا بدي أستشهد آه، وأيامها الساحة كلها ملانه والملك حسين الله يرحمه ويقول أنا الفدائي الأول، يعني أنت معك شرعية هسه زي ما تقول كل المجالات تمشي، وللا إجي علي واحد مرحبا يا شب أهلا وسهلا، شو اسمك؟ محمود طويط، قال أنا اسمي إبراهيم برجاس.

أحلام التميمي: [00:57:20]  
إبراهيم؟

محمود طويط: [00:57:21]  
برجاس.

أحلام التميمي: [00:57:22]  
برجاس.

محمود طويط: [00:57:23]  
من سكان مخيم النصر. أهلا وسهلا صرنا ندردش ها، تركته بعد أسبوع قلت له أنا بدي أصير بفتح، قال لي ليش؟ وأيامها التنظيم شلون فترة اختبار ودراسة وتحقيق مش في الساهل زي ما كانوا يقولونا بالرمثا روح ادرس، وشو والمدرسة كان فيها نشاط كثير، المهم قال والله ما بقدر هاي مسألة بدك تمر بمراحل، بعدين هاظا الشب إلي كان يجي معك منو؟ قلت له تعال أقول لك، هاظا فلان الفلاني اسمه كذا، قال هاظا من شبابنا، قلت له كيف؟ قال هاظ من شبابنا من فتح، قلت له اسمع صار معي كذا كذا، قال لي شو اسمه؟ قلت له هاظ إلي صار إنت بتقول لي هاظ فتح وهاظا إيش؟ إخوان نظمنا أساس إخوان، قال طيب أنت بعدك بفترة اختبار شوي شوي شوي، بعد فترة شهرين ثلاث شاف شاوفوا كمان علاقتي موسعة مع الأساتذة مع المدير مع الكل، في الرياضة نشيط كلهم أغلبهم بالتنس بالكرة القدم يعني إيش، محنا الرماثة كلهم إيش يعني مبدعين برة القدم، والشباب إلي عندي الأربعة لعيبه، صرنا أنا والرماثة الخمسة هذول هم أساس الفريق، كنا بالأول ثانوي، قال لي خلاص.

محمود طويط: [00:59:04]

هسه بالأيام هذيك الساحة بتغلي، كل الأردن بغلي نزل مشروع روجرز، شو مشروع روجرز هاظ؟ تصفية العمل الفدائي كيف؟ ما فيش ألفة يظل بالأردن بين الفدائيه والشعب وكذا لازم تقضي عالمائل هاي، طبغًا مشروع روجرز كان بدعو، طبغًا هذيك إلس الأيام كانت الساحة المصرية تغلي، وجمال عبد الناصر الله يرحمه مسوي استنزاف خط بارليف والجبهة السورية غير مستقرة، والأردن العمل الفدائي مليون كثيف كل إشي فدائي فدائي فدائي إيه يعني عدم المؤاخذه ما كنش فيه هيبة للدولة هذيك المرة، مهو الواحد يعترف إنه وبين الأخطاء لما يكون عدم استقرار، إذًا الدولة بدتها توخذ وقتها بدتها توخذ مصالحها وفي مشروع لإنهاء المسألة هاي وما كنش صارت النعرة بين عمود مسلح وبين جيش وبين شعب وبين كذا صار فتنة، الفتنة هاي كانت عامة طبغًا أنا ما كنت بالرمثا الحمد لله إليّ ما كنتش بالرمثا هذيك المرة لإن إنت تكون في الرمثا وتكون فدائي ومع زي ما تقولوا المقاومة ورمثا صعب، نفس الإشي بالجنوب إحنا عندنا من كل مناطق الأرم الأردن موجودون المدرسة، إبراهيم (..) كان بمدرسة الشوبك فلسطيني ساكن جو جبل النصر، المهم بدت العلاقة فتح عن طريقه وصار فترة اختبار فترة الاختبار هاي نجحت.

أحلام التميمي: [01:01:21]  
كيف اختبروك؟

محمود طويط: [01:01:23]

سلوكي مع مين بتمشي كذا كذا هذا شو هي تطلعاتك كذا، هون شعروا الجميع إني أنا تنظمت الشباب إليّ عندي قالوا يعني إنت متنظم معهم قتلهم آه، قالوا إنت شايف الجو وصار زي في فتنة وكذا وسيبك من الشغله هاي قتلته بقدرش، يعني بقول للشباب إليّ عندنا بالرمثا ما بقدرش يعني أنا هيك، يوم على يوم ويجوا إليّ تبعين الثاني ثانوي وتبعين الثالث ثانوي ويحكوا معي من منطلق إنه سيبك منها قتلهم لأ قتلهم أنا مقتنع وبعدين أني بسألکوا.

أحلام التميمي: [01:02:12]  
هذا الكلام كان سنة السبعين تقريبًا؟

محمود طويط: [01:02:15]  
لأ بالتسعة وستين بعدنا.

أحلام التميمي: [01:02:16]  
بالتسعة والستين.

محمود طويط: [01:02:16]

قتلهم طيب أني بسألكم هسا فلسطين لين مش للجميع مش كذا مش كذا، قالوا إحنا عارفين كل شي بس إنت بتعرف هذا الوضع وصارت عنصرية جيش وفدائية و وسبيك من هالموضوع قتلهم لأ، هسا منروح إجازات كل أسبوع بقلي أبوي يابا شو قتلته شو؟ وشو بتسووي المدرسة اليوم، قتلته كويسه سمعت إنك صاير فدائي قتلته لأ دائماً يعني قال لأ تخبيش علي وبدناش مشاكل وخليك بقرايتك قتلته إن شاء الله، صارت تتكاثر إنه يودوا لأهلي على الدار ابنك كذا، حاول حاولنا يعني نخليها سلمية ماردوش يا شباب قالوا والله هاظا موقفنا وهي موقفنا صار إيش إلي الإدارة السج المدرسة كمان شو يسوي تفتيشات بالغرف وما غرف ما يكون في تنظيمات لا تنظ في سلاح إشي، إيه لما يصير إيه في تفتيش يجوا الشباب يقولولي في كذا كذا، نروح إحنا مع بعض ونطلع مع بعض يا عمي مافيش إشي المدير عبد الوهاب الطراونة من الكرك أردني ناداني قلي تعا يا محمود شو مالك قتلته ولا إشي قال شايفك متضايق قتلته آه والله فيه مضايقة بس أني عادي قال أنا من الكرك أردني وبصير مضايقات عندنا هناك مسائل عادية وما بدناش توتر قتلته أنا ما بسوي توتر ولا بسوي إشي، القضية مش قضية أنا كشخص وصارت مركزية أنا أنا شايفني بسوي إشي قتلته لأ قالي لأ قتلته هاي المسألة، قالي أنا بشجعك على الدراسة وهاظ وكل هالأستاذة يحكوا معي بالدراسة بس كل الدكاترة والأساتذة فتح، ما عا هو حل وسط يعني المدير هون صارت تتضخم السولافة يوم والأيام، طبغاً إحنا كنا بالمدرسة كلنا مع بعض ونمثل عالمسرح ورياضة ويجينا من المدارس الثانية من الربة من الكرك من كل المسائل ونستقبلهم وتصير احتفالات وعندنا دورات بيج بونغ وهاظا يعني تصفيات مدرسة بتعج بالنشاط وبالمباريات يعني قبل لا نحكي عن السياسة قالوا في عندكم مباراة مع مين معا معا.

محمود طويط: [01:05:07]

قلنالهم ماشي إحنا الرماتنة أساسية بالفريق كان عندنا أستاذ رياضة (very long)، اسمه شفيق قال ها قتلته يلا توكلنا على الله كان إل الرماتنة إلي هو حسن مياس عبد القادر الشقران الله يرحمه خضر أبو شقرة محمد عبد القادر البشابشة هضول طبغاً كلهم صحابي وأصدقائي كلنا طيبين ما عادا عبد القادر قبل ليموت شو عبد القادر وشو يا محمود شلونك كويس وشو عندك قال كل شي عندي قتلته شو قصدك يعني قال عندي دسك عندي قلب مفتوح وعندي

له يا زلة، قال آه والله مريض يا محمود، بعد فترة مات، رحنا وين قالوا بس معان بدهم يستعينوا بفريق الجيش السعودي إليّ عندهم بمعان بدهم يجيبوا لاعبين، قلنالهم وإحنا راحيين نستعين باثنين من نادي الحسين، قال قلت قلنالهم آه مش بدكوا لعبية دولية حن بنجيب لعبية دوليين، رحنا على معان طبغًا مش تراب الملعب حصو يعني صُعب، بدت المباراة أنا بلعب يمين ويسار السبب إنه وأنا بالطفولة إبراهيم أبو غازي الله يذكره بالخير جاري كنا نفجر قاعة الدار بدنا نسوي قال إيش مسبح صغير، وبهالفاس خبط خبط إجي الضربة وين على الإظفر هاظ (..) يا إبراهيم بقول ولا أسهل منها تعال تعال تعال إشلح عن إجرِك وخط عليها كذا كذا كذا مي وكذا وقال بول ومش عارف إيش بطيب، قتلته روح يا زلة إنت جاي تمزح هسع ومتنا من الضحك، المهم هسا ما بقدرش ما ألعش كرة قدم وصرت ألعب باليسار قلت رُب ضارة نافعة صرت ألعب يسار ويمين، وكان بسموني إيش مهدهد الحراسة نزلنا عالملعب أوه أول دقيقتين كنت مهدهد على الجول جول المعانيه، هَمَّ شافوا هيك والمعانيه ما بسكتوا وإحصى وحجر إحصى وحجر حجار، ونقول مش مهم مش مهم خمس دقائق عشر دقائق الأستاذ مراد قالي هسا بدبحونا، بدلي قالي إطلع إحنا مش جايين نسوي هوشة هساع، يعني ثلاث تهديفات خلال خمس دقائق كنت إيش مهدهد الحارس، أطلعني طلبونا هظلاك معترفين السعوديين، ارجعنا عاد عالشوبك هناك آه بالشوبك بالدرسة شوي اشتدت الأزمة بين الحكومة الأردنية وبين الفدائيين، كان أبو إياد يخطب يا جماعة خلي إيش نهدي الوضع ومافيش أنزل توترات ولإزم إيش نقيم أوضاعنا، كان مهو أبو إياد كان حكيم بيعرف يعني شو أبعاد المستقبل وشو في وبيعرف بالسياسة إنه الاستيطان مش لازم يصير وحرام.

محمود طويط: [01:08:31]

شوي ولا المدرسة مطوقة من أهل الجنوب وين الواد وين أهالينا هي تقول إيش المدير قال فوتوا كلكوا بالصالة تبعت الجمباز وتبعت المسرح، صرنا نلد بعض انقسمنا قسمين وين بدك تروح طبغًا ظليتي بهالتنظيم، يلدوا علي الشباب من إريد من عجلون قتلهم ما بصيرش هيشا لازم نكون مع بعض إجي واحد من مادبا معن محدية صار يصيح ويخطب يا شباب إحنا لازم بعض بنظل مع بعض وإحنا لازم نكون طلاب وملناش دعوة وإلي بصير مالوش دعوة، إجوا المحاصرين طالبوا بأبناء الجنوب قال لهم لأ تطلعوش إحنا مع بعض شمال جنوب فلسطيني أردني كلنا مع بعض، طبغًا هَمَّ لَمَّا يجوا يعني وما بعرفوا شو في، شلون علاقاتنا وخلص مندفعين لأنه الجو السياسي عاصف ملتهب ما فيش إمكانية تحدد إشي، شو محمود قتلهم لأ غلط هظولا ضيوف عندنا إذا مش إلهم أصل عندنا يعني مهم كلهم كلهم أردنية، ظليت معهم ساعة ساعتين مفاوضات المدير الدنيا العالم طلبوا المحافظ، المهم بعد أربع أو خمس ساعات انحلت سلم إجينا إحنا اتخذنا قرار الطلاب نروح عيبيل لتهدا الأمور يجوا هظول

الشباب طب إليه أعطينا اسم يعني أسماء إليّ نمر على الحاجز صار حواجز عالطريق، شو بدي أقلكم نصير نكتب إحنا أسماء مزيفة أنا فلان أنا من كذا أنا من البلد هاظ من البلد هاظ، وصرنا نروح جمعات ربك وحميد كل واحد وصل مكانه، إليّ بالقويسمة إليّ بعمان إليّ بالرمثا إليّ بعجلون إليّ بعين إليه عين جنا إليّ بالجنوب جنب بعض، وكلها إيش قبل ليصير أي صدام، وهون بالحالة هاي أنا رجعت للرمثا هسا الوضع بالرمثا أصعب وضع بكل الشباب إليّ رُوحو، طيب أنا فدائي وبدي أنا أستشهد بدي أروح أحرر فلسطين، وأنا شو دخلني فيّ وليه ومش ناوي لا مع هاظ ولا مع هاظ أنا بعتره الكل واحد، أنا نزعتي بالبداية آي ما بعترفش لا إردني لا فلسطيني لا سوري بالمرّة هاي المسائل بعتر إنه إيش إحنا عرب كلنا، عبد الناصر قال تزترن براسي للفجر بمعنى قومي يعني، لكن آي بعتر قمة الوطنية هي الجهاد، يعني عندي نزعة دينية قوية يعني أنا وصغير كانت جدتي الله يرحمها توخذني على المسجد وأصلي معها وأنا صغير، وإحنا عييلتنا يعني مدينة مش ناحية التزمت زي مافي هسا لأ يعني فطرية.

محمود طويط: [01:12:19]

قعدنا فترة بالزُمتا وصارت أحداث أيلول، أحداث أيلول الكل بعرفها وقاسية وحادة و يعني تداعياتها أكثر من إليّ ممكن إحنا نفهمه ونحكيه، لأنه هاي بتيجي لصناع القرار والطبقات العلا من السياسيين إليه إشي مُدمي وترك أثار سلبية كثيرة، طبغًا فترة أيلول انتهت طلوعوا الفدائية ععجلون وجرش وبالله، بدنا نرجع على المدرسة، رجعنا على المدرسة المدرسة نار وصراعات آي طبيعي حاد قديش محبوب الجميع الكل بس بده إيش يمشي معي بكل المجالات فكرت بالموضوع كان معي شاب اسمه عرار التل هاظا بصير عمه المرحوم وصفي التل، هاظا عرار علاقتي معه قوية كثير خاصة باللعب يعني إحنا كنا نسوي مباريات بين الصفوف، صفنا دايمًا هو الأول المدير بحبني لّما كان أنزل عاللعب يصير يطخ بال(..)، عبد الوهاب الطوار الطراونة الله يرحمه صارت بطولة بينا إحنا وبين التوجيهي على الكاس وسووا انتشار كامل من العرض و عملولنا زي ما تقول منشان تتويج ونزلنا على الملعب عرار التل الحارس إله علاقة مع التوجيهي هضلاك علاقة قوية لكن بده يلعب إلنا طبغًا عرار التل فيما بعد لّما ننتقل على إربد بده يصير بصفي ونروح نابري بإربد طيب هون صار إيش أول إل اللعبة خمس دقائق سبع دقائق كنت مسجل جول، اعترضوا مين التوجيهي خلوني طالع ويشمطوني هون، كانت الأحذية هديك شبه بستر يعني مسامير وشغلة زي هيكل، قمت آي رأسًا زعل المدير لا اطاشوش لا كذا، ومش لا اطاشوش زعل منشان، قلناله خالص مشي الموضوع أستاذ، امشي امشي فزنا قبل لنفوز سووا حركة تبعين التوجيهي بدهمش عضو التتويج إجي المدير قال للسكرتير إنت خليك هون وآي منسحب، إجي عرار التل أخذ الكاس ومش بس أخذ الكاس منشان يستفزههم أكثر منشان يحط هظول انجنوا، فتنا عالمدسة الصبح إحنا داخلية رمضان رن الجرس عالفطور رحنا على

الغطور إلا التوجيهي يضربوا عن الطعام إيه، قالهم المدير مالكو قال إحنا بنعترفش بنتيجة وكذا وكذا قال اطلعوا من المدرسة كحشهم، راحوا على المحافظ المحافظ اتصل بالمدير من هون ومن هون قال للمنا المدير، يعني هاض شو كمان توجيهي والظلم بأثر مش واحنا أطفال كنا نزل ظلم برضه واحنا بمرحلة الثانوية، هاي مرحلة من المراحل طبعا هسا لما رجعت أنا من الرمثا هسا الهمز والغمز والسوالف التطبيقيس عليّ آني، قلت آه هون معناته رح يصير صدام بينا إحنا وخاصة أنا، لأنهم بدهم يصيروا يقولولي كنا نقولك ما تردش ولهسا معند، قلت للمدير ولأستاذي أنا بدي أوقف دراسة قال لأ ناداني المدير يا محمود أنا قتللك وهيك وهيك حتى عندنا بالكرك وكذا وكذا و كذا، كلهم يحاولوا في أستاذ البستنة أستاذ الزراعة الدكتور الكيمياء من عارف ال، يعني مهو بعرفوني وببوسوا وهاضا وحتى أنا وولادهم صحاب كنت ألعبهم فطبول وإشي هاض قتلهم صعب.

محمود طويط: [01:17:16]

بعد فترة ولّا عرار التل بقول أنا معك بدنا نروح يا زلم خنّا يقول، روّحنا ورحنا على إريد بدنا مدرسة مش حكومية لأنه مش رايحين يستقبلونا إحنا من مدرسة خاصة ولا بقول المدير شو مؤهلاتكوا كذا قلناله قصتنا كذا كذا كذا هاي المدرسة إخوان مسلمين، قال منقبلكو بس بنقبلكو أول ثانوي شو إلي أول ثاني محنا مترفعين واحنا ثاني ثانوي علمي أقوى من إليّ عندك إليّ أول ثانوي قال بعرف، لأنه إحنا بالصف الأول الثانوي كنا نقرا العلمي منهج الثاني ثانوي الكيمياء، الفيزيا، الأحياء، هاي البستنة وكلها (سندرون دلكتلون) ومش عارف إيش وأسا وكلها أسماء لاتينية كمان يعني عندنا حصيلة علمية كويسة والكيميا كويسة وكلّ هاضا منهج الثاني ثانوي، قال ما بقدر إلا ترجعوا أول ثانوي درسنا أول ثانوي وأثناء الدراسة .

أحلام التميمي: [01:18:30]

شو كان اسم المدرسة إلي بإريد؟

محمود طويط: [01:18:32]

المدرسة الإلزامية بإريد شارع الحصن هاي معروفة يعني معروفة لكل إريد، المدرسة حتى مهما كان النظام وشديد الأستاذ شو يكون فيها نوع من التسرب شوي عرار قال بدنا نفل من الفرصة اليوم شو بدنا قال بدنا نفل مش أنا عريف الصف بدي أصير عريف عريف عليكوا بالسيميا بدنا نروح نحضر فيلم.

أحلام التميمي: [01:19:03]

هونا لّما انتقلت للمدرسة في إربد إن إن يعني انتهى التواصل بينك وبين إبراهيم برجاس؟

محمود طويط: [01:19:12]

أيلول ما حداش بقدر يعرف عن الثاني بعدين كثير سمعت أنا الأستاذ الفلان اختفى فلان سافر إل فلان كذا الطلاب مش عارف وين راحوا مهو كانت إيش يعني معركة أيلول قوية كثير، طيب هون رحنا قلنالها طيب رحنا على سينما الجميل بإربد وحضرنا هالفيلم و وقف إيش عريف صف علينا، ثاني يوم رحنا بالمدرسة فات المدير السلام عليكم وعليكم السلام شو يا شباب كيف هالفيلم ممتع؟ كل واحد يفتح إيده كل واحد ثلاثة عشر بربيش في معي واحد رمثاوي من المرشدة قالي يا محمود أنا مش رح أفتح إيدي قتلته لا تفضحناش قال مش راح أفتح إيدي، ترى دير بالك إبراهيم قالي ولا إبراهيم ولا غيره مش رح أفتح، قال له أستاذ أنا ما بفتح إيدي إفتح ما فتح قال له ما بفتح إيدي، قال له روح أسبوع روح هسع هو قاله هيك توتر الجو بالمدرسة في واحد من الفرق قال انتوا انتوا رمائة بدكوا تخربوا المدرسة بدكوا كذا تلاشكت أنا وياه، قتلته تحكيش عليه بالمرّة صار يسب عهظاك أوعا تفتح ثمك ما إلّك عنده منه للمدير كلنا ماكلين وهي إنت ماكل ثلاث عشر واحنا ثلاث عشر هظاك عاقبه وروّح، صار إيه يسولف كفر علي مين سمعه الأذن المهم اطايشنا مع بعض نادانا الاتنين، قال له يا أستاذ هاظ كفر شو بتكفر بالله أسبوع عالمفرق تجيش إنت محمود ثلاث تيام ما تجيش، ارجعنا بالمدرسة بعد ست أيام وبقولوا الشباب شو الوضع قالوا ما خلا ولا بقى بده يروح يجيب الكلشنات ويطخك، المهم مارجعش قال لهم لأجل الرمائة والله ما أظل بهالمدرسة، عاد يعني مسألة شخصية شو دخل الفرق بالرمثاوية بس خلاص هيش يعني طبيعة الطلاب.

محمود طويط: [01:21:49]

بل بإربد طبغًا صار وضع ثاني خلصنا الأول ثانوي بحمد الله وانتقلنا للثاني ثانوي علمي الثاني ثانوي علمي طبغًا صارت فترة جرش، يعني كنت إيش متواصلين على أساس نعيد إيش التنظيم، هون بالمرحلة هاي إعادة التنظيم طبغًا التنظيم سري رح يكون تنظيم سري صار بالرمثا اتجندت حوالي ثلاثة عشر شب على أساس إنه هدفنا فلسطين بالمستقبل والحرب والاستشهاد وشغلات زي هيك، إجت فترة إجي واحد قال آني سمعت إنتوا كذا وأنا بدي أتنظم معكوا وأنا إلي تاريخ بفتح وأني ملازم أول كنت وهان، بالحالة هاي قلت بدي أستفسر لّما استفسرنا هناك بدرعا قالوا حاول معاهم قلنالها ماشي، طبغًا كله سوالف ومحاضرات مافشي ولا بقول بدي أعرفك عواحد كمان ملازم أول وكان معنا منين هو قال من السلط وبدنا نعرفك نعرفكوا على بعض قتلته ماشي رحت على السلط وقعدنا أنا وياه قال والله أي هيك هيك قلنالها طيب قال أنا بصير أنظم بالسلط وأزودك بكل إشي وإنت بتوصل هناك، قلنا توكلنا على الله صرت

مسؤول تنظيمي ومسؤول تنظيمي بالسلط وأروح عالسلط وهاظا اسمه سليمان الحيارى، ولا بورجيني وراقه هي كذا هي فلان وفلان طب تعرفنا على الشباب قاله نستقبله قتلته طيب راحت الأيام إجت الأيام كان يجيني نداءات بالراديو من فلان إلى فلان ننتظركم كنت أروح على درعا طبغًا مشي محداش بشعر في ولا الدار ولا إشي نسولف بدنا نعطيك غراض ومتفجرات بتوخدها وبتحطنهن هناك منشان إيش نقطة عبور للضفة.

أحلام التميمي: [01:24:39]  
إشرحلي شوي عن الراديو كيف النداءات هاي يعني كان برنامج؟

محمود طويط: [01:24:43]  
كان لأ بالمنظمة.

أحلام التميمي: [01:24:45]  
نعم.

محمود طويط: [01:24:46]  
صوت العاصفة صوت فتح صوت الثورة الفلسطينية، في فقرة منهم نداءات عسكرية من جميل إلى فلان يعني آني نسيت الاسم إلي كانوا مسميني ننتظركم، أروح تلقى الأوامر وكذا قتلته مافيش عندي مانع يعني منوخذ الأسلحات وبنحطنهن لما يصير إمكانية لعبورهم للأرض المحتلة.

أحلام التميمي: [01:25:11]  
مين إلي كنت تقابله إذا بتذكر إسم؟

محمود طويط: [01:25:14]  
آه بعرفهم هاظا بالارتباط يعني فتح.

أحلام التميمي: [01:25:18]  
نعم.

محمود طويط: [01:25:19]

ب بدرعا إسمه جميل ومسؤول عنه الراحل إبراهيم طرمان إليّ راح يكون إله دور إخراجي من سجن سورية.

أحلام التميمي: [01:25:29]  
إيش عائلته إسمه؟

محمود طويط: [01:25:31]  
مهيه هاي كلها أسامي حركية جميل ينادي إبراهيم ترمان.

أحلام التميمي: [01:25:34]  
طورمان.

محمود طويط: [01:25:36]  
رائد طيب يوم من الأيام المخبرات بيحوا ببلغوني إنه إحنا بدنا ياك أني كنت إيش فاتح الدكانة وسوبر ماركت إليّ قلي أبوي افتحه إيش.

أحلام التميمي: [01:25:53]  
إنت في هذا الوقت التكليف قمت فيه كنت تنقل متفجرات ولا بس بعد ما.

محمود طويط: [01:25:58]  
آه آه عندي عندي بالرمثا كانت.

أحلام التميمي: [01:26:01]  
توخدها من درعا وا.

محمود طويط: [01:26:04]  
لل للرمثا.

أحلام التميمي: [01:26:04]  
للرمثا نعم.

محمود طويط: [01:26:04]  
ومخيلناه عند واحد من أعضاء إله التنظيم تبعنا.

أحلام التميمي: [01:26:08]  
نعم.

محمود طويط: [01:26:09]  
إسمه عبد الفتاح أبو زريق.

أحلام التميمي: [01:26:15]  
تمام.

[01:26:15]

ورحت عالمخبرات السلام عليكم وعليكم السلام شو؟ في قال إنت محمود طويط قتلته آه قال بدنا إياك بالمخبرات بكرة بتيجي علي، روت على الدار شوفي يا محمود بقول أبوي كان عندنا هالتخت هيك قتلته هيك هيك، بقولي في عندك إشي قتلته لأ بابا إدا في عندك إشي قلي بنتواسط إشي فيه قتلته لأ، ثاني يوم رحت كانت عند الجمرك المخبرات المظلة هاي إلي بتروح عالدار، ها محمود تفضل كلبشوني وخطوني بهالسيارة وشحنوني وين على إريد دائرة المخبرات بدوا تحقيق استمر أسبوع، يقالوا لهم ما في إشي يا زلة في عندك إشي أقول لهم ما في إشي يا زلة إنت دارس شو دورة مخبرات دورة إشي إلي هو وين كاين بدنا نفهم شو هاض؟ ما في إذا يفوتوني عسجن إريد إلي هسا صار متحف ويرجعوني عدائرة المخبرات دائرة المخبرات بحد السجن، أنا هون وآني بالمدرسة قبل كنا ندرس نتدرب جيش شعبي وندرب فوق في مدرسة عند دوار الساعة بإريد اسمها العروبة، يعني بجنب الحسبة ونتدرب عظهر السطح يساريمين دورة كاملة إلي قبلها كنا مسوين كمان دورة بالإسلامية هاي إلي كنا إيش فيها.

أحلام التميمي: [01:27:59]  
تفاصيل الدورة كيف يعني تا زحف؟

محمود طويط: [01:28:01]  
جيش شعبي كامل.

أحلام التميمي: [01:28:02]  
نعم.

محمود طويط: [01:28:03]  
كل شي عسلاح وهاظا وكل شي تدريب عسكري.

أحلام التميمي: [01:28:05]  
نعم.

محمود طويط: [01:28:07]  
وأنا بالرمثا كمان أخذت الدورة هاي ورحنا رمينا بنادي الرماية وطبعًا كل الأمور سرية، طيب هسا وأنا بسجن إرد نمشي عييل يعني محتجز جابوا الشاويش إليّ كان إيش يدربي عظهر الحيط قالوا له تفرج هاظا إليّ كنت تيجي تدريه جيش شعبي، المهم أسبوع بالليل نادوني هالمخابرات يا محمود قتلهم أنا ما عندي إشي نهائيًا، قال الليل بدنا نوقعك ونطلعك نراقبك، قتلهم ما في عندي مانع طبعًا هسا بالسجن لما هناك كنت يسألوني أشياء قلت له والله ما في في رمائة في كذا في كذا ما فيش، وكان فيه جيش كثير يعني إل إيه السجن مختلط في مدنيين في هارين من الجيش في فدائية في كذا في كذا من مخيم إرد من هاظا كلّه ملان، المهم يوم نادوني وقفوني قال إقف هناك إلا فايث واحد ووقف إليّ أيّ إليّ أيّ نظمته هاظا بعد أسبوع خاف إجى بده يطلع عسورية وهم قولوا له تعا، هاظا إليّ هسا هو محامي آه أنا قتلته ما في إشي سكت، فات رد طلع فوتوني شو ها قلنا لهم ما اتفقنا إنه نوقع ونروح قال تروح وين تروح وهاظ قلت له شو هاظ، قال لي ما حكي كل إشي خلاص ما في إشي إجى ضابط المخابرات إليّ يصير صار فيما بعد مدير المخابرات العامة جاسم فراج قلي محمود إقعد تغلك وبلش طبعًا هون بعد الضغط وبعد كذا وبعد المواجهة ما فيش إمكانية بدنا نطلع بأقل الخسائر، قتلته ماشي الحال قال هسا بنصير نجيب أشكرة يعني إيش عن جنب وطرف وبدك تبلي الناس كلها، المهم انمسكت مجموعتنا إليّ بالرمثا قالوا تعال وفتنا سجن إرد هسع شو بالسلط .

أحلام التميمي: [01:30:54]  
كم كان عددكم؟

محمود طويط: [01:30:56]

والله يمكن ثلاثة عشر، هسا السلط قلنا مافيش إشي ولا هو السيد جاسم الحماري إيه الحياي  
كاين ما عندوش جواز وبده يرجع جوازه فبده يقدم معلومات منشان إيشا وكل الأسماء.

أحلام التميمي: [01:31:16]  
مقابل إل الجواز.

محمود طويط: [01:31:17]

وكل الأسماء هذيك وهمية إليّ يعطيني إياهن، طبغًا صارت محكمة هون نقضب سلاح كمان  
شرق الوادي وإجوا المخابرات وكلهم طالوهم، هسا صار تهمة كبيرة وأيامها الوضع متوتر والله  
يرحمه وصفي التل مستشهد طائرة فهون شو بده يكون مصير محمود؟ الإعدام، إجي أبوي  
وقف محامي من دار الخريشة ضابط كبير متقاعد طمن أبوي قالي إينك صغير بالعمر وما  
بصيرش عنده عليه إعدام، في ضباط مخابرات عندنا بالرمثا يعني رماثة وكان ابن عمي بالجيش  
سابق عنده إليّ بالمخابرات، نقول له نقلوه عالخبارات العامة وهاظ بس ما بنقدرش نسويله  
إشي وهالوسطاء محمد فواز والخضوان قالوا له ما بنقدر نسوي إشي، يعني بدك تسوي شو بدك  
سوي هاظا متهم بي بمحاولة انقلاب، طيب يا عمي شو المخالفة الموجودة المسألة مهو تنظيم  
سري والتنظيم سري أبعاده كذا، بس بالدولة وبالقوانين يعني مش بصدقوا عليك لأ في قانون  
بده يحكم ما إلها دعوة السوالف شو بمخك وإنت بدك منشان أجل فلسطين هاي مسائل  
إنت بتقولها لكن بالقانون غير شكل، حولونا لمحكمة عسكرية وكان رئيس المحكمة العسكرية  
تيسير نعاة، طبغًا فترة التوقيف كانوا كل إليّ أهاليهم معتقلين بما فيهم أهلي يجوا يزورونا  
بسجن إربد إلا أنت إيش إجت المحاكمة.

أحلام التميمي: [01:33:31]  
كيف ظروف سجن إربد الحياتية كانت؟

محمود طويط: [01:33:36]  
مختلطة.

أحلام التميمي: [01:33:36]  
مختلط.

محمود طويط: [01:33:37]

قلتلك مختلطة.

أحلام التميمي: [01:33:39]  
وعايشين كلكم في غرفة واحدة في صالون كبير أو كيف.

محمود طويط: [01:33:41]  
لأ هاظا سجن إليّ مشرق في جاووش كبير ومن المغرب في جاويشين كبار بالسدر في الحمامات.

أحلام التميمي: [01:33:52]  
نعم.

محمود طويط: [01:33:53]  
طبغًا واجهنا صعوبات السجن يعني مثلاً بصير نعرات عسكري فدائي فلسطيني أردني شغلات زي هيك، في كوي هناك إله ابن معنا، إيه تشاحن هو واحد اسمه طلال من عندنا من الرمثا ضربه طبغًا هون لما ضربه بدناش نضل ساكتين، كان في مدني عندنا اسمه البس من الزرقا هاض بده يفزع هون اشتدت الأمور بلشت الناس تسب عبعض مدير السجن فتح الباب واعطى الأمر للبادية تفوت، بدها تسيطر عالسجن السجن بده يلحم بعضه، صاروا ينادوا واحد واحد أكثر واحد أكل قتلة من التميمي هاظا واحد من الخليل تميمي ذبحوه ذبح، المهم إجي دوري كان موقف القتل خلاص بكفي يعني مكلتش قتلة يوميهها، بعدين تلممت السوالف هسا لما رحنا عالبحكمة العسكرية أبوي بده يستنجد بكل إشي راح على مدير المدرسة اسمه جاسم خصاونة هاض شديد ومحترم وإله مكانه قاله ابني هيش هيش قاله شو بدك مي يايب يا إبراهيم قال تشهد مع ابني قول بشهد كان محترم كان كذا كان كذا هاد إليّ بعرفوه قاله خلاص هسا إحنا هناك قلت أنا معناته بدي ألبس القضية وبدي أطلع هدول قتلهم لا تخافوش هي اعترافاتكم محدودة وأني مهو أني إليّ جبت سلاح وآني كذا وآني نظمت وآني كذا، القاضي صار يحكي معي قلت له كلُّه عندي، كذا كذا إنت إنت إنت نعم نعم نعم عندي شو قلت له آني يعني بدي استشهد بدي أحارب بدي كذا صار الأوضاع صارت هيك بس آني هاظا هدفي ولا بدي أسوي كذا ولا بدي أسوي ولا عندي خلفية سياسية ولا بآمن بالشغلات هاي، آني كفرد بدي أقدم واجبي وأريح ضميري وهاظا إليّ صار معي هاض أبدًا ما في غير هيك بعد جلسات متواصلة.

أحلام التميمي: [01:36:28]

الثلاثة عشر كلكم أعضاء الخلية كنتوا نفس الكلام؟

محمود طويط: [01:36:32]

كل واحد دستوره معه وأنا إليّ إيش يعني ما في إنهم يحكوا مع بعض كلهم، مهو أنا إليّ حلقة عانفراد أحكي معهم محاضرات كذا كذا كله عانفراد يعني بجوز كمان في ناس ما بعرفوش عن بعض، حكمني ثمانية عشر سنة واثنين ثلاث عشرة والباقي خمس، هسا بالحالة هاي رجعونا عالسجن هون بالسجن بنظل ممنوع أحداث القانون الحدث ينقل يعني عندهم خيارين يا ينقلونا لعمان، يا إما نفي عمعان وكان القرار نفي عمعان.

أحلام التميمي: [01:37:19]

كم كان عمرك بالضبط؟

محمود طويط: [01:37:21]

أقل من ثمانية عشر.

أحلام التميمي: [01:37:25]

آه.

محمود طويط: [01:37:25]

هناك بمعان مارسنا عملنا حطوني مسؤول أسرة وهاظا مسؤول سرير ليش، لأنه في أحداث كثير ومظاهر كثير وأساتذة، رجعنا حتى أيامها حطوني مرشح منشان أدخل سباق الضاحية كنا نطلع الفجر نصلي الفجر ونطلع نركض سبعة كيلو السبعة كيلو هاي ركض سريع بدقائق لازم تخلصها ونرجع نلعب كرة قدم ونمارس حياتنا، طبقًا بالفترة هاي إنت تروح كل أسبوع، صارت في حادثة ظريفة إنه إيران استولت على الجزر الثلاث طنب الصغرى وطنب الكبرى وأبو موسى روجت ضليت نازل عإربد رحتمكتبة بشارع الهاشمي أخذت ورق فلوسكاب ومن ورق هاظا إليّ إيش كربون وروحت عالدار كتبت منشور، المنشور بقول طنب الصغرى والكبرى جزر عربية ولا بد من أنها تظل عربية وتعود عربية وبديت يعني يمكن من صفحة وعلى ورق الفولسكاب سويت مناشير كثيرة هسا ثاني يوم بدي أرجع عالدرسة، إجيت على واحد من ولاد عمي وما بدريش شو السوالف وشو، بالسن صغير قتلته هدول بتوزعهم بكرة بالدكاكين هون بالمدارس بشغلات زي هيك.

أحلام التميمي: [01:39:05]  
ووقعتهم باسمك ولا باسم؟

محمود طويط: [01:39:08]

ولا اسم حدا شو هاض آه، هاضا إيش عند عرابية الحمص عند إل ببيعوا فول بالدكاكين وهون، ثاني يوم بتنزل المخبرات وهاضا اتلم من هاضا وهاي وصلها المعلومات طبغًا آني روت ما بدريش حدا عن هالشغلة هذي، هاي هون انحكمتنا صرنا نروح ونيجي للإصلاحية، صرنا نتصل من برة كان معنا واحد من دار أبو حلوة أخوه خالد أبو حلوة وين عند أبو جهاد بالشام بل إيه بالعمليات المركزية، نفل ما نفل شلون، آني بطبيعتي بعرف كل المنطقة وكنت يعني أطلع وأجي على سورية بكل أريحية محداش قبضني بس هسع لّمن انسجنا ولّما إيش صرنا بالسجن تنبهوا لنقطة وسوا شيك حدود على حدود درعا والرمثا، صارت اتصالات قال أبو جهاد أنا بوديلكوا واحد لعمان منشان (..) يعني يكون دليل طبغًا هاي قبليها كان منهو بالسجن معي كمان عمار كاسترو هاض كان من أشبال أبو إياد، حاولنا نفل إجي عندي لّما إجي عندي هسا إجي بالليل بدنا نوكل مافيش دكاكين وها، إجت أمي قالت خلص آني بعجنتك قرصة وسويها عالصوبة وبصير خبز أكلنا طبغًا أمي ما بتدري شو فيه وشو بسوي اطلعنا قبل الحدود بشوي على أساس نفل أنا وعمار بدون ليعرف أبو حليوة، لّما وصلنا ولا المنطقة مزروعة كلها كمائن وعسكر مافيش مسافة ها، هاي من المعجزات تبع رب العالمين إنه ما يصير في إشي يعني يعني إنه الله أنقذني من الموت مرات كثيرة، انسحبت قتلته اسمع هيك هيك هيك روح ما بنقدر بتنا بالدار ثاني يوم إيش رجعتنا للإصلاحية، طبغًا لّما رجعتنا للإصلاحية صرنا نخطط قلنا ما دام بده يجي دليل خلاص هسا إجازتنا خلصت إحنا بنوخد إيه إجازة يومين ثلاثة خلصت، وصلنا عمان طب الإجازة خالصة رحنا اشترينا من محل شفرة شفرة نسر، مسحنا التاريخ ومددناها يوم قلنا ما بتدريش يمكن إيش واحد يقول هويتك بطاقتك، ولّا جاي زلة اسمه أبو محمود شلونكوا يا شباب قال هسا إنتوا بدكوا تسووا زي ما بسوي حاضر، هسا بدنا نركب من عمان لوين للزرقا من الزرقا بنروح على سيارات الفرق بس أقوللكوا اقفوا بتوقفوا إحنا ترى بدنا نزل حم بالحمرا، والله ركبتنا السيارة لّما وصلنا بالحمرا قال انزلوا نزلنا أنا ومين أخوه لأبو حلوة ومين وواحد اسمه صاعق أبو جعفر أبو جعفر وأبو حلوة وأنا، نزلنا قال بدكوا تمشوا معاي خطوة خطوة في مجنزرات في سيارات كل ما شفتوا إشي توخذوا الأرض، كل ما تيجي ضو سيارة أو مجنزرة نوخذ الأرض نمشي نمشي وراه توصلنا الشيك، قال أنا بفوت قدامكوا وإنتوا بتتبعوا خطواتي، اطلعنا اطلعنا من الشيك اتشاهدت قالوا امشوا ظلينا نمشي قالوا هاي نصيب قرية سورية اسمها نصيب وفوتوا على دار المختار فتنا بدار المختار.

أحلام التميمي: [01:43:48]  
الشيء تسليقتوه ولا نزلتوا من تحت؟ نعم.

محمود طويط: [01:43:53]  
آه، فتنا بدار المختار وبتنا هذيك اليوم ثاني يوم أبو محمود قال تعالوا اركبوا هالباص وين دايركت ديمسكس عالشام هناك فوتونا غرفة العمليات وعرفوا علينا فلان فلان وفلان، طيب أكرمونا وشغله هاي قالوا يالله ويوخذونا عالمسكرات هناك.

أحلام التميمي: [01:44:24]  
في أسماء معينة في التنظيم قابلتها أول ما وصلت بغرفة العمليات؟

محمود طويط: [01:44:30]  
إل يهودا أبو حلوة خالد أخوه لخالد أبو حلوة هاد هاشم أبو حلوة معروف.

أحلام التميمي: [01:44:38]  
أحكي لي.

محمود طويط: [01:44:38]  
بعدين حولونا مين على أم جهاد وين بالمكتب شؤون العس شؤون الأردن، اسمك اسمك اسمك شو اسمك قتلها محمود إبراهيم محمود طويط، فلان كذا كذا قالت هسا بدي أصرفلكو مساعدات منشان اتدبروا حالكم عيب لا يصيرلكوا رواتب ما قصرتش أم جهاد، كان أيام قدري وأيام إل شؤون الأردن كلهم هطول كانوا أم جهاد المسؤولة كنها صرفتلنا، وأخذونا عاد زي ما تقول بعديها للمعسكر، بدت هناك مرحلة جديدة قال ليش محمود هون وهظاك مش هون، بصير تقييم شو هاظ وشو هاظ وشو هاظ بعد الفترة هاي إجوا سحبوني مين؟ جهاز التسعة وأربعين بشرف عليه مين الله يرحمه مجيد الأغا هاظا المركز تابع للقيادة وتابع للأمن الرئاسي وللدوريات الخارجية وإعداد وإنشاء للمستقبل، يعني أيلوس وألمانيا وشغلات زي ما تقول لكن هناك بتم الفرز بتصير دورة إعداد وتدريب تدرنا وبعدين.

أحلام التميمي: [01:46:18]  
أحكي لي عن تفاصيل التدريب؟

محمود طويط: [01:46:21]  
أبو عتاد آه.

أحلام التميمي: [01:46:22]  
إيش تتدربتوا.

محمود طويط: [01:46:23]  
كل شي.

أحلام التميمي: [01:46:24]  
مثل؟

محمود طويط: [01:46:25]  
طيب أنا من الدو إل إيه، الله يرحمه أبوعمار بعد أكتوبر قال بدي أعطيكو محاضرة عن حرب أكتوبر، المحاضرة كانت بتس يعني بتتلخص بأنه شو الفوائد بأنه مضادات الدروع كان إلها أثر قوي في حرب أكتوبر.

أحلام التميمي: [01:46:49]  
تلقيت المحاضرة من أبو عمار مباشرة؟

محمود طويط: [01:46:53]  
آه لعاد مهو في عندنا في قاعة الشهيد فهد فؤاد القواسمي، طبعًا قبليها أبو عمار قال بدي أجمع فيككوا، إحنا اجتمعنا قبل للمحاضرة هاي، هو كايين قايلن له في واحد كذا كذا كذا اسمه محمود طويط من الرمثا، قال عاوز أشوفه كان في عندنا شجرة أفوكادو ومش عارف إيش وكاكا وهل البراقية قالوا تفضلوا هون محمود، كان معي ناس من الكويت جاينين من طرفي إزيك يا محمود قتلته الحمد لله قال إحكيلي تفاصيل كذا فلان وفلان وأهلا وسهلا من الرمثا قتلته آه من الرمثا يعني دردشة كأول معرفة، طيب إل اللقاء الثاني مع أبو عمار قعد بشرحنا قال فين الشيخ؟ رأسًا أطلق علي اسم الشيخ مني أنا متدين وبصلي وهاظا وشغلة، قتلته نعم قال اطلع آني ما بعرف إنه مطبوخة سولافة بين مجيد وأبو عزام وأبو ماهر وأبو جهاد، سلم علي ومعه مسدس توكاريف، قال ده مشانك لخالصك ونشاطك وكذا كذا كذا، قتلته شكرًا سلمنا بعض وواصل المحاضرة، ده اسمه الشيخ ده رمز الوحدة الوطنية، المحاضرة الثانية

إليّ هي دروس أكتوبر كان جايب معنا، إيه جاي معاه وفد الوفد هاظ بده يطلع على الوحدة طبغًا هو لما إل إليّ هي التجارب لما حكالنا إياها، قال عاوز أشكل وحدة تسعة وأربعين مقاومة الدروع وبدي تدريبوا، طبغًا هسا التدريب صار كانوا موديلنا الكويت بسيارات سوزوكي صغيرة بالمشاتل عندنا ما حطينا مضاد للدروع إليّ هو مية وستة، كان جايينا من الصين مدافع غير مرتدة اسمها خمسة وسبعين هاي بتوازي (..) يعني رأسًا في إلها ثلاث قذايف هالثلاث أربعه من القذائف منشان اختراق الدبابات، تدرينا عليها طبغًا هاي السيارة سوزوكي جنبي واحد عالرشاش وواحد سايق وأنا عالمدفع ورا، يعني كل سيارة طبغًا تدرينا هسا صار في تخريج، التخريج مين بده يصرف عليه أبو ماهر عضو القيادة اللجنة المركزية وعبد الله خليفة وزير الداخلية.

محمود طويط: [01:50:04]

ووين اليدان السوري للعسكرات السورية ومراكز التدريب السوري لأنهم كمان قبلها كانوا مسويلنا دورة صاعقة وين بحرستا إليّ هو بالشام، خليفاوي وإجى أبو ماهر كان أبو ماهر معه مسدس تاش شتاير إيه وأطلق النار قال يلا، طبغًا هون التدريب كان عسكري مية بالمية تبعين جيش التحرير إليّ كانوا إيش بمصر ول بدربونا و وقفنا خلف المدفع وتسبيقات وهاظا وهدفنا كلنا بالجول كلنا صدنا، هسع أبو عمار بده يتباهى فينا قال باليوم الفلاني بدي أجي، هسا قبل ليجوا قالوا لي أبو نائر آي كنت محبوب بالمعسكر ويعني بعتمدوا كل إشي هالشغلات إل هاي، آي كنت يعني دارسها، بده يجي السفى الملحق العسكري المصري وبده يكتشف شو التدريب وشو إليّ استفيدتوه من تجارب أكتوبر، و قتلهم لا تخافوش هسا إحنا عند دارسين الدوسية كاملة المدفع إل خمسة وسبعين، قال سيارتك هي الأساس ها، وصل الملحق المصري عملنا مناورة بالسوزكي السيارة الصغيرة إليّ هاي محملة المدفع الخمسة وسبعين الغير مرتد إليّ مخصص لقنص الدبابات، إجي وإن وراه يعني وبفهمش شو بسوي وبعرف شو بده شاف أعجب بالمنورة والتحرك وتقدم من هنا وا وا، قال طيب بدي أنا أسأل إليّ هو مسؤول عن المدفع، السلام عليكم قتلته وعليكم السلام ورحمة الله وأديتله تحية كيّف هو قالي شو هاظا إليّ عندك؟ قتلته حسب ما إحنا تدرينا وحسب ما هو موجود بل إيش بالكورس تبعه، طبغًا هاظا صناعة صينية هذا مدفع خمسة وسبعين يطلق ثلاث أنواع من القذائف خارق حارق متفجر ومتفجر وإنارة يعني بكشف، حلو قتلته هاظا المدفع من أهم مميزاته إنه بدور ثلاثماية وستين درجة، وفتحت إل هاظ وصرت أدور أنا والمدفع يمين، قالوا كويس وهاظا المدفع يستخدم ضد الدبابات ويمكن إنه يستخدم ضد المشاة حسب ظروف المعركة، ويمكن يكون تخليص أرواح ما بتعرفش إيش.

أحلام التميمي: [01:53:04]

حسب مع معرفتك إل، الدبابات هاي الأسلحة إليّ كانت موجودة عند حركة فتح من وين كانت مصادرها؟

محمود طويط: [01:53:11]

كلّهُ مساعدات أهمها من الاتحاد السوفيتي ها، هاي أولًا من كوريا من الصين وشغلات زي هيك هاي كلها العربات هاي كلها من الخليج مثلًا عندك ستة سلندر معروف منين من الكويت، عندك يعني سوزوكي هي صناعة اليابانية لكن من مين آه، هون لّما وصلت النقاط هاي قالي بدي أسألك سؤال وهون الجد كل إليّ حوالي صنفوا يشجعوا فيه يشدو عليّ لإنه هاظ ملحق عسكري بدي أقولك قديش درجة التكبير بعدسة بالمنظار تبع إيش تبع المدفع، قتلته أولك سؤال مشروع والمفروض إنه يكون مكتوب قديش بالدوسية هاي إليّ قريناها، لكن مع اعتذاري الشديد مش مكتوب إما يعني بالترجمة أو يعني خطأ غير مقصود مش موجود، لكن آني بقدر إنه هذا المدفع قبل لا تطلق فيه لازم توخذ تسبيقة، إح الشباب كلهم صاروا يضحكوا كيفوا، والتسبيقة هاي بتوخذها لإنه سرعة الدبابة قديش إنت بدك توخذ تسبيقة لّما تطلق القذيفة يكون الهدف جول، طبغًا تصفيق الشباب صار يضحك قالي يعني جاوبت بطريقة أُخرى، قلت له وبدك الدوسية آني بجيبلك إياها قال لأ خالص بارك الله فيكم وحياكوا الله، كان مبسوط من اللقاء كثير و كانت تجربة يعني إلنا، لإنه هاظا جاي عنده أشياء معينة ثقافة هاظا المقاتل مدى استيعابه للأسلحة التجاربه هل همّ فدائية هيك غوغاء زي ما الناس بتقول ولّا عندهم خلفية، طبغًا أنا لّما كنت أحكي ما آني عندي اللغ اللغة كويسة منين من مصدر علمي فهم فهم كل شي قال كويس. انتهينا من المسألة هاي هسا في مسألة ثانية إجي أبوعمار الله يرحمه جايب معاه مسؤول من جنوب إفريقيا يمكن إيش أول مرة بشوف طوله هاظ وقال هاظا يعني مسؤول بحركات التحرر وجاي يشوف الإداء تبعكوا طبغًا إحنا كلنا صافين ومعنا الأسلحة وكذا وتدريبنا طبغًا زي ما قتلتك جيش نأدي التحية وكل شيء.

أحلام التميمي: [01:56:02]

ما حكالكم اسمه أو بتذكره؟

محمود طويط: [01:56:05]

مهو مش ما حكاش أنا مني متذكر اسمه لأنه هاظا بكون إليّ هو ضمن التشريفات يعني جايلنا فلان إحنا المقاتلين يمكن ما وصلنا الاسم، قال بدي أشوف العرض تبعكوا بالقاعة فؤاد القاسم قاعة الشهيد فؤاد القواسمي، التدريب رياضي طبغًا منو هو بدهم ينتدوا الشيخ إليّ هو بتدرب

كاراتيه بي بمعسكرات سورية طبعًا أنا مدربي شمس الدين صوفاناتي بطل الشرق الأوسط  
ومدرب قوى الأمن الداخلي السوري.

أحلام التميمي: [01:56:45]  
هذا أعطاك دورة خاصة بالكاراتيه؟

محمود طويط: [01:56:48]  
بتدرب عنده.

أحلام التميمي: [01:56:49]  
نعم.

محمود طويط: [01:56:50]  
أنا خريجه هاظا شمس الدين صوفاناتي بطل الشرق الأوسط و مدرب قوى الأمن الداخلي  
السوري.

أحلام التميمي: [01:57:00]  
طيب التدريب عنده للكاراتيه كان بتكليف من الحركة ولا قرارك الشخصي؟

محمود طويط: [01:57:04]  
رغبتي ودعم الحركة عحساب الحركة.

أحلام التميمي: [01:57:07]  
جميل.

محمود طويط: [01:57:07]  
كنت بروح يوم بعد يوم سيارة المعسكر بتنقلني من القاعدة لوين لنص الشام إل بويه إل نادي  
الأوربي نادي الرياضي هاظا وين بحي المزرعة بنص الشام، كان هناك التدريب يوم بعد يوم بطل  
الشرق الأوسط دريني، طبعًا هون انزلت عالساحة وعالحلبة ومعني مين صاعق فتح الله إليّ هو  
أبو جعفر كان هاظ منافسي دائمًا بالكاراتيه وبالسباق لكن كنت آني الأول بالمعسكر يعني، انزلنا  
صُرنا نتدرب شهر هجوم وهجوم ذبحنا بعض، بتي بس بتي بس يا شباب كيف يعني كيف هاي

طبغًا إيش معه الوفد ومعه الممثل هاظ، يعني أعطى صورة شلون إحنا عسكر وشلون رياضيين وشلون نوخذ دورات، فكرة التدريب مع العسكر كالتالي، أنا طول حياتي رياضي فقلت لهم أنا بدي أتدرب كاراتيه الأخ مجيد قال وعحسابنا قتلته لأ قال لأ صُرنا نروح يوم بعد يوم هاظا نادي رياضي إيش مدني عرفوا بعدين إنه إيش إنه إحنا فدائيين، وصار طباع يطبعوا معنا بالتدريب بتعرفي من هون من هون في من المتدربين مدنيين سوريين وشباب ها، قال جيمي أنا و واحد المهم طببت إيشضربة مني بتمه، زعل وشب يعني زي ما تقول عرفت فيما بعد إنه أبوه مسؤول كبير، شلون بدنا ننفذ المسألة هاي، المدرب صار يضحك قال على مهلكو، المرة الثانية آني بدي أمتص إل هاظا وأخليه يعني وضعه بين الشباب مش مكسور الخاطر يعني، فتحتله وجهي صار يضرب ما زبطش معه يهجم يهجم ما المهم سلكناه، هسا منو بده يستدله نائب المدرب بس إيش يعني مش إنه يضربني يضربني بده يعني زي ما تقول يشوف قابليتي ويخلي هظاك يتفرج علي شلون هو بضربني، أنا هسة هو هاي الإيد اليسار مفتوحة ضربني ماوشقري طببت هون طقت قتلته آلتني قالي معلش، استمر جيمي جيمي المهم إيش استمرينا، طبغًا روحنا العسكر قتلهم هيك هيك حولوني وين عمستا عمستشفى حيفا عمعسكر إيه مستشفى فلسطين صوره وهذا مافيهاش إشي يا زلة، هاي لحد الآن هاي من أميت من الأربعة وسبعين لحد الآن العظمة بارزة، طبغًا هاظ خطي لكن إيش برضه مؤلة يعني، شغلة ثانية صارت مع ربيع ربيع بطل والمدرب الكاراتيه وهو بطل العسكر تبعنا.

أحلام التميمي: [02:00:21]

ربيع إيش؟

محمود طويط: [02:00:23]

ربيع اسمه كان اسمه الحركي ربيع وهو إيش معنا يعني فدائي بس مختص بالهاظ برضه ضربني بظهري هو كان ليش بركزوا على أساس إنهم بدهم إيباني لقدام بدهم إيباني لقدام لحد الآن إيش بشعر فيها، طيب في هسا بعد الدروس وأبو عمار وهاي الشغلات زي هيك في كان يحصل عندنا بالمعسكر زيارات، لإته هاظا المعسكر تبعنا معروف هاظ للقيادة هاظ للعرب هاظ للتدريب دايماً الساحة غاصة بالتدريب في شغلتيين وحدة أبسط من وحدة الأولى إحنا طبغًا كل يوم بتركض سيارات المعسكر بتحطنا عسبع سبعة كيلو متر واركض بصل المعسكر أول، كنت بجيب الأول يعني رغم إنه في ناس أطول مني وخطوتهم أكبر بس بجيب الأول، أنا يوم من الأيام بمشي وبركض وها وصلت الأول ولّا المدرب بقول مش قتلوكوا ما بدري شو بعد مش قتلوكوا، طبغًا كل الضباط موجودين قال شيخ قلت إيشر بدي إيباك بشغلة قتلته آه قال في تمرين الخمسة عشر حجر، هاي إنت بدك خمسة عشر حجر تنزل توخذهن واحد واحد كلهن خمسة

عشر وترد توخذ خطوة وتنزلهن كلهن وتنزلهن كلهم وتمشي كلهن وتمشي كلهن لعند آخر وحدة، آني عرفت إنه في يعني اختبار بده يوديهم لياقة وامشيهم كلهن الخمسة عشر وأقوم شو سويت صُرت أهول قال لي قال صفقوله مش قتلوكوا إنه لياقته واحد وا واحد على واحد، هاي من ضمن النهفات يعني إذا بتقول يعني بكون تنافس بين المدربين بين القادة بين الضباط بين كذا، مرة ثانية إجوا علي قائد المعسكر مجيد وأبو عزام ومجيد الله يرحمه قال لي شيخ قلت له قال أبو جهاد بده منك تمثل المعسكر، قلت له شو شوفي؟.

محمود طويط: [02:02:56]

قال بدنا نعقد هون مؤتمر العمال الفلسطيني بدريش أي يعني أربعة وخمسين شو رقمه مهو كل سنة بصير إيش مؤتمر عمال فلسطين وبده يجوا علينا وفود منهم من ضمنهم الوفد الفيتنامي وإنت إلي بتستقبل الهدية منهم، كان مدرينا مين اللواء عبد الله جلود صُرننا نتدرب قالي شيخ بدك تأدي التحية أبو جهاد قال آه أي بدي تحية مدنية وعبد الله شو يقول لأ تحية عسكرية، قتلهم طيب وصارنا نتدرب عالتحية، قلت لهم أنا عندي اقتراح إنتوا بدكم إياي أخ أبو جهاد مشان ألبس مدني، قال آه قلت له وبأدي التحية وأنا لابس مدني، قال بزبط اتفقنا مهو دايمًا المعسكر والمدنيين في اختلافات بينهم، انعقد المؤتمر ساحة كبيرة إحنا هاي وكمان ساحة كبيرة، واجت الوفود والخطب وهاظ وصلت الفقرة إنه إيش الوفد الفيتنامي بده يقدم لإيش الفلسطينيين، هسا كلهم أبو ماهر أبو جهاد كلهم مجتمع ما عدا أبو عمار ماكنش هاي الأيام، وهسا شو فكر شو هو الهدية دعم مالي دعم كذا ولا واحد عارف شو في، إنت قدمت وسويت استعداد ورفعت إجري هاي تحية وهاي رد علي التحية قدمت عليه تباوسنا آني وباه قدملي هديتين، الهدية الأولى شو هي كل شعاراتهم إلي بتعلقن هون وهاظ وهان.

أحلام التميمي: [02:04:50]  
الأوسمة.

محمود طويط: [02:04:52]

الأوسمة، الهدية الثانية شو؟ ولا هو جايبلي صُرة كلها خواتم قال هاي خواتم مصنوعة من طي من طائرات إيه اللهم صلّ على سيدنا محمد إلي كانوا يساقطوها أمريكا إلي بأيام فيتنام، الطائرات إلي كانوا يسق الأمريكيين نسيت نيعها نوعها، أما هي مصنوعة منهم شوفي لوين، يعني كانوا يسقطوا الطائرات بفيتنام ويجيبوها ويصهروها ويسوهم خواتم آه، الأشي الصُعب والمحزن إحنا كنا بالمعسكر قتللك إنه هاظا المعسكر هام وحساس أنا لما بروح بتدرب كاراتيه يجوا يوصوني الشباب كلهم أشبال وهاظ وشغلات زي هيك، أنا جيبلي زيبب أنا جيبلي فستق

أنا جييلي كذا، أنا أحيانًا من غير لا يوصوني من راتي مرات بجييلهم عوامة مرات بجييلهم سمك مرات بصفرهم طابور وبوزعهم، المرة هاي كلهم موصيني إجيت بالليل نايمين طبعًا في نهفة للنوم وينهم، آني حرك ودايمًا شو بسوي بغافل الحرس وبمشي من هون وبفوت وبغير وبطلع طب هاظا شلون فات؟ مي عارف كل إشي بالمعسكر يصيروا ينصبولي كمائن ما تذبش معهم.

أحلام التميمي: [02:06:30]  
هل كان المعسكر إيه إله اسم حركي معين؟

محمود طويط: [02:06:34]  
تسعة وأربعين معسكر تسع وأربعين.

أحلام التميمي: [02:06:36]  
تسعة وأربعين حكينا.

محمود طويط: [02:06:36]  
آه وجواته معسكر إيه هاظا قاعة الشهيد فؤاد القواسمي حمورية هاظ.

أحلام التميمي: [02:06:42]  
تمام.

محمود طويط: [02:06:42]  
المهم حطيت كل واحد غرضه جنب راسه نمنا الصبح أخذتهم طابور ورجعت وإجى علي مسؤول المتفجرات المدرب قال لي شيخ بدي إياك قلت له تفضل، قال برجوك قلت له يازلة شو بدك قلي شو أبو العز مالك شو فيه؟ قال في عندنا دورة متا متفجرات وآني بعرفك إنك بتعرف المت بتحب المتفجرات، وبعرف كل إشي وعد من هاظا الشنب إنك توخذ ساعتين لحالك، قلت له شو يعني قال بديش تحضر التدريب ليش؟ قال بدك تحمينا بتقعد بتقف عباب المعسكر قلت له عادي سهلة أنا مطيع دايمًا، خمس دقائق عشر دقائق طرت بالهوا شو في؟ لديت كلّه أحمر دم سحبت الأقسام وصرت أركض ولا هو جاي مجيد الأغا الله يرحمه شيخ لا لا لا شو فيه؟ قال مش منهم إحنا في عنا مشتبه فيه وإشي وكذا، بفك آني بفكرني إني بفكرهم طلعا وسووا إشي بالشباب إليّ لينا، اركض معي اركض معي أمن سلاحك هسا أبو العز الله يرحمه وهو بدرهم بقول لهم هاظ لغم ما بنفجر بالأفراد هاظا بس بالدبابات، ما حظ رجله عالصاعق

لقيناه شقف، ثلاثة عشر شهيد بالعدد وثلاث عشر جريح صرنا أنا والشباب نشوف إليّ فيه الروح  
طبغًا الهيلوكبترات السورية طارت فوق المنطقة الإمبلنصات بحمورية إنتلت.

محمود طويط: [02:09:04]

فالمنظر هاظ كان مخيف لّما تشوف إنت شباب جايبيلهم الأكل جايبيلهم التسالي وهم بعدهم  
مكالوهنش وقدامك كلهم صارعى ونتيجة خطأ ومش بساحة المعركة فإنت بتجن يعني بكون  
عندك شعور صادم شعور مخيف، لكن بنطلب من الله إنه يكونوا بميزان حسناتهم وعهوا نوا  
نيا نواياهم ويدخلهم الجنة، أنا لّما.

أحلام التميمي: [02:09:33]

إنت رفعت الأشلاء؟

محمود طويط: [02:09:33]

هسع لّما شفنا هاظا متوفي هاظ متوفي صرنا نختار الطيبين ونحط بالإمبلنصات، بعد ما خلصنا  
مشينا وصلنا شوارع الشام قضيناها مشي حتى إجينا على مستشفى المواساة مستشفى  
المواشاة المواساة هاظ مستشفى كبير بدمشق، المهم صرنا نوزع الدكتور قال لي تعال هاظا الشب  
شريف هاظا إيه شريف طويل القامة يافع يعني صغير بالعمر قال لي هاظا في عنده ثلاث إصابات  
بالصدر، يعني نافذك وخذ هاظا المغذي وظل ماسكه عيبيل لا يجي دوره فيش له دور تينقذوه،  
أنا ماسك البواجب أكثر من ساعة ونص ماجهوش الدور فارق الحياة بين أيدي، تركنا إجينا على  
غيره طلعلالك المصابين لفوق على الأسرة، إيه المنظمة يعني إل الحركة ودت اثنين أطباء  
فلسطينيين خادمين بالأسطول البحري الأمريكي كمرضين، توانسة بالذات كنت أنا وباهم  
بالغرفة وتساعدنا أنا وباهم، إيش بدكم بقول لي طب إنت، قلت له أنا لازم يظل هون هظول  
معي، طيب إجيت عواحد وطمنته قال لي أنا بعرف إنه وضعي صعب بس شيخ قول لي شو  
مالي شو مني، طبغًا هو رايح منه رجل وفيه كمان شضايا كثيرة، أطمنه بدي أشوف إخراجي  
آني عادي بني آدم مش بني آدم نطمنه، إجيت على زهدي زهدي هاظا شب صغير أبيضاني إيه  
يعني شبل صغير كثير، قال لي شو يا شيخ قلت له ما فيش إشي رايحة عينه ومقطوعة إيده  
وأطمن فيه، قال لي شيخ صارحني أقوله ما فيش إشي إن شاء الله خير إن شاء الله خير، وهاظا  
زهدي قبل خمس سنين ولا تلفون ألو ألو أنا زهدي قلت له مين زهدي؟ يذكر فيّ يذكر فيّ، قلت  
له آه قلي أنا الشبل إليّ كنت توخذه وإليّ انقطعت أيدي وراحت عيني، وين إنت؟ قال صارلي  
من يوجّ إيش فت عفلسطين لحد الآن بدور عليك بدور عررا لقيت رقمك وبديجي بدي أجي  
على الأردن قتلته طيب حياك الله أول ما تصل خبرني، إجي علي كان لقاء غير شكل آه.

محمود طويط: [02:12:50]

طب إنت لما تشوفي حجم الإصابات بالشكل هاظ، طبغًا طلبني أبو ماهر وكان الجينرال عفانة أديتلهم التحية وقلت لهم صار هيك هيك هيك، طب شيخ الله يعطيك العافية وإجى المعسكر وخليكم هون، قلت له لآ (sorry) قلت شو قلت لهم بدي أظل عند الشباب عييل لنشوف الوضع، قال لي وانا مهمات كثيرة قلت لهم طيب، بعد أسبوع رجعنا للمعسكر هاظا المحترم هاظا إليّ خرج كثير من الكوادر، هاظا أذكر يعني بذكر أنا لما كان يجي أبو عمار فجأة علينا فين أبو عادل، أبو عادل أصلًا طباخ عندنا ميخ واسع إحنا زي ما تقولي يعني مطبخ كبير كنا نزرع بي بالأرضية سلق يعني زي شفقي السبانخ زي السبانخ بس هناك بسورية بسموه سلق، كانوا يقطعوه ونجيب مرقة عدس وشغلات زي هيك ونحط كان يقف مع أبو عمار عاوز أتغدى معكم تفضل أخو أبو عمار، يعني إيش بحرية كاملة يعني مافيش كان زي أيام أول زي هيك بدك استدعى وبدك وبده ضيافة لآ، شلونك يا فلان إزيك إنت إزيك إنت بهالعناويات يعبيننا وهو ينشد بالدم بالروح، بنروح بنقوله يا أبو عمار يقول لآ فلسطين فلسطين، بعدين لا تقول بالدم بالروح نفديك يا أبو عمار يقول لفلسطين، يحمسنا ويضل طالع يعني هاي كانت لقاءات مختلفة.

محمود طويط: [02:14:30]

في كمان كوادر الثورة ول يتكرر علينا أبو الحكم الله يرحمه مسؤول القضائي الثوري ومسؤول الرغيف، هاظ كان بالجيش الأردني مسؤول التموين الثورة سلموه إيش المخابز والكذا وكل إشي أنشطة بالتمويل كان بيجي لآ لآ ضمن لجنة التحكيم هو وهاني الحسن، بحققوا مع ناس مشتبهين وشغلات زي هيك أبو الحكم دايمًا جيبولي شاي بليمون لازم شاي بليمون ما تقدموا شاي عادي، كانا إيش يضلوا للساعة واحدة بالليل اثنين للثنتين بالليل ونظل عليهم حراسة عييل ليروحوا، وكان يتكرر علينا كثير شخصيات يعني منشان اللقاءات، لإنه هاظا معسكر إيه مهم ودقيق، بعد المعسكر نقلونا وين لمعسكر ثاني بالهامة الهامة السورية هاظ معسكر واسع وكنا نتدرب فيه أنا بصلي يمر علي واحد يصير يقول لي إنت بتلعب جمباستيك، هاظا من الجيش الأحمر التركي اسمه جيهان يعني هو عملاق جدًا ومعه دورات كاراتيه وما كاراتيه وشغلات زي هيك، بصير أمرح أنا وباه نتدرب هاظا وين كان يختار النوم ما يرضاش ينام عندنا، احنا طبغًا في عندنا شجر عالي مسويله عش فوق وبنام فيه، ينام آجي أتشعبط آي عالشجرة وأقول جيهان قوم ها ها قلت له إجي وقت المشي، يقول يالله يالله أنا نازل نازل ونصير إيش نمشي إحنا وإياه، كل ما يشوفي أصلي إنت تلعب جمبازستيك كثير يعني مش واصليته قضية الدين وما دين مهو شيوعي بالجيش الأحمر، أحيانًا وحنا قاعدين بالمعسكر حولينا وهين غرف هيك

بنجيب فيها ناس، بتلاقي كل واحد طربوشه هالقد الشيعة طبغًا هظولا حزب الله وما حزب الله إليّ كان قديم، ما كان في حزب الله كان أيامها بس المشايعيين هظول مناصرين للثورة قبل ليصير أمل وحزب الله ويصير يحاربونا أيام أيام لبنان، لّما كنا إحنا ندرهم ترى فتح هي دربت كل العالم، يعني أنا روحوا تدريبوا عندنا وكل حركات التحرر إد تدرت عندنا.

محمود طويط: [02:17:01]

مرة جاب إيش مناصرين للثورة الفلسطينية من باريس من فرنسا شايف، كنا إحنا نجيبهم للمعسكر مش نستنى تا يجوا ونقوللهم هاظا فلان هاظ هاظا هدهاه أبو عمار (تروجيريف) هاظ كذا هاظ هو مش يعني بده يفهموا كل السوالف نيصير إحنا نسوي تدريبات قدامهم ونسوي إيش هو إحنا بدنا نسوي معتقداتنا ليش إحنا منقاتل شلون مخيمات شلون شعبنا وشلون إحنا انتفضنا، فا في دعاية في زي ما تقول عمل متواصل عمل متواصل ما في توقف وإنت تعيشي كل الحالات، الحزن لسا شواهد الفرحة إنه صار إلّك نصير إلّ يعني شعور إحنا اطعمنا من كل شي صُرنا إيش يعني أصحاب تجربة نضالية واسعة ثقافيًا، يعني مثلاً بدي أعطيكي مثال مجيد الله يرحمه وأبو عزام كانوا مسؤولين على إيش في من من ضمن الأجهزة المخبرانية تعرف يورجون كل الصور هاي هظول الصور لين هاظا الجنرال كذا هاظا فتح هاظا هاظا كذا هاظا بسلاح الجو الإسرائيلي هاظا كذا يدرّبونا عليهم.

محمود طويط: [02:18:12]

اثنين ها شوف هاظ جواز سفرك يجي أبو عزام يربطها جواز سفره ويضيفه منشان يعطي لواحد يطلع أمير لأوروبا، يعني عمل متواصل بتشعري إنه إنت بماكينة عمل متواصل ما فيه تا يعني توقف ولا واحد يلد عالثاني لأ، يلا شيخ إنت وفلان ها هاظا الفطبول ي خبطخبط خبط عالابواب ليش منشان المشتبه فيهم إليّ كلهم ورا الغرف يظلوا مستنفرين، ويذكروا يعني ما يشعروا بالراحة لأنه متهم هاظ، طيب أجي أمسك الدفتر إحنا مبادئ فتح واحد اثنين ثلاث أربعة كذا كذا بصوت عالي، طيب نيحي نفتح عواحد منهم بتعرف مبادئ فتح؟ يقول لأ نشعرهم إنه إنتوا كمان الأخطاء إليّ سويتوها إنتوا ناسين كل إشي، يعني إنتوا ضيعتوا حياتكوا وضيعتوا انتمائكوا ردوا إيش لذاتكوا، افهموا شو في بالموجود ليش إنتوا هيك، وفي من منهم عمستويات عالية وبأجهزة عالية وبدول ثانية، يعني أنا حضرت إليّ هو أبو نضال لّموا أبو نضال كان بالعراق وانشق عن فتح، يوم من الأيام ولا جايين هالشباب يتراكضوا شو فيه؟ يم نفس السبع بحرات بدمشق إطلاق نار بطاردوا مين مجموعة أبو نضال ولا هم جايينهم عندنا، في منهم طيار خاف الله إيه إيه من جنين أو إبصر منين، المهم إجوا عندنا حطينهم بغرف ومستويات عالية طيب هاظا نقيب هاظ ولكوا ليش هيك سويتوا؟ ولا جاي أبو عزام تعال شوف المسدسات إليّ معهم

إشي هظولا هالقديش الماسورته الطلقة هلقد، طيب هاي بدك تقتل مين بدك تقتل أبو ماهر وأبو جهاد وأبو عمار طب لويش شو استفدت، طبغًا انشقاق كان صُعب وانشقاق كان إيش.

أحلام التميمي: [02:20:12]

عمل محاضرة أبو عمار عن هذا الانشقاق وفهمكم أسبابه ودواعيه أو إيش؟

محمود طويط: [02:20:17]

هو أبو عمار أيامها وقتها كان فاضي إليّ إنه الضباط إليّ عندنا عبد المجيد كان مرافق لأبو عمار ومسؤول الأجهزة الأمنية كلها إليّ حواليه.

أحلام التميمي: [02:20:28]

جميل.

أحلام التميمي: [02:20:28]

وبعدين خريج جامعة ومسؤول كان يدرس كنا إحنا لما نفوت الجامعة أول إشي يعلموك شلون تحط الشوكة وشلون تحط المنديل وشلون إنت مثلاً بدك تمثل الوفد وعندك إجاك وقد أجنبي شلون تتعامل مع هذول، مش يقولوا آني فدائي حيالله فدائي لأ، طبغًا بالجامعة علوم سياسية خاف الله كان ها، فبقدر يعني يحكيلنا شو إليّ بصير هون وشو إليّ بصير هون كان فبقول لنا هاظ طيار هاظ نقيب هاظ هظولا جاين يسووا انقلاب جاين إيش يسووا انشقاق طب ليش، لأنه كان التدخل واسع من قبل الأنظمة العربية خاصة حز خاصة الحزبيين، لأنه وجود منظمة التحرير ووجود الثورة ووجود فتح كجسم مستقل وفاعل يعني دوائر الكبرى أمريكا وغيره ما بدهم إياه، فعطوا إعازات وإشارات لكل الأطراف هاي الإقليمية إنه ها من عندكوا شوي هذوا المسألة هاي، لأنه قضية قرار مستقل ها قرار مستقل بس ينفذ بوعي شيء كثير كبير وبأثر وبهز، رغم ذلك إحنا كنا بالمنطقة هاي وسورية نتمتع إيش يع يعني بحرية يعني أنا بذكر كنا نطلع بالسته سلندر الجيب ومعنا الجعبة كاملة والكلشن كامل ونلف السبع بحرات، وهاظا إشي ما صار يعني بالحياة ما صار بدمشق نفسها إنت تروح بدك وتروح على حرستا وتروح عميدان الرماية تبع سورية وتندرب هناك كان في احتضان للثورة، لكن فيما بعد طبغًا تغيرت الأمور وتغير التاريخ، هاظا معسكر تسعة وأربعين إليّ شهد كل المراحل هاي وقد ما بده يحيي الواحد عن المعسكر ما بكفيش، المهم إجي مجيد قلي إسمع يا شيخ تعال هون إنتوا يا شباب بدكوا تسووا عملية والعملية هاي نجاحها صفر كا أحياء الشهادة ممكن تسعة وتسعين بالمية، لكن عملية حجم الواقع إليّ إحنا منعيش فيه سياسي أكثر منه عسكري شو كان مستشهد

بيروت كمال ناصر كمال عدوان والشهداء الثلاث قالوا العملية رح تكون طويلة وبتوخذ وقت والعملية هاي.

أحلام التميمي: [02:23:17]  
أبو يوسف النجار.

محمود طويط: [02:23:19]

أبو يوسف النجار الله يرحمه إيه ورح تكون أطول عملية بتاريخ فحت إيه بتاريخ فتح وإنت شيخ بدك تكون مسؤولها، قلت طا مافي مافي مشكلة، طبغًا ودونا على سورية على المعسكرات السورية وأخذنا دورة صاعقة وكان عندنا ياسين سعادة إليّ هو قوات اليرموك قال مجيد بدي تروحلي عليه هناك وتوخذوا إيش دورات تنشط هالشباب، إيه في مفارقات إحنا زي ما تقول بعتبرونا تبعون القيادة مدللين وكراتيه وما كاراتيه وشغلات زي هاي، وهظلاك إيش نمط عسكري الجيش الأردني القديم، ورحنا كل يوم طبغًا أنا بوخذهم وبجيبيهم، هسع إحنا في كان واحد اسمه خيرالله عراقي مدرب قدير بس منهم يعني، طبغًا اطلعنا رحنا عالمعسكر يوم من الأيام، طبغًا إحنا بحلبة الاشتباك وعاليسار وعاليمين بتو صفات، في واحد من عندنا شب مش عارف يزيط إل إيه الصفة وإيده بتوجهه، يا خيرالله اترك هالزلة قال لي شيخ لا تتدخل آني عارف إنكوا بتفكروا حالكوا سورمان وكاراتيه وأيلول أسود وعمليات، قلت له لأ طيب حاضر حاضر، المهم ما تركوش الولد بده يعيط، طيب إنت دربه قول له احكي له، قلت دورة للخارج اصطفاف قال لي شو؟ قلت له هاظا إليّ إجاك وسحبتهم عالمعسكر وأروح وتولع للقيادة ولأبو جهاد ولجيد وأبو شكري.

محمود طويط: [02:25:15]

أبو شكري كانت قائد قوات المحمولة وعندنا بالمعسكر، قال لي شو هاظا شيخ؟ قلت له هيك هيك قال ما يكون تعال إجي حززوا بقطع مهو هيك العسكري مهما كان هيك الإجراءات، ظيلنا يوم كامل يا مجيد يا أبو شكري يا أبو شكري صاحي، المهم قال شيخ إنت بتعرف بالعسكرية هاظا إجراء لازم احجزه عيبيل لأسكتهم، عاد كان معهم واحد إليّ هو اسمه يونس العاص هسا كان قائد الشرطة الفلسطينية كلها، دايمًا يجي وين الشيخ بده يلعب معي إيش تنس، اليوم بدي أغلبك أقوله يالله ما يقدرش يغلبني أغلبه، هاظا كان أخذ الأول على دورة الصاعقة بالجيش الأردني مقدم يعني كويس، بضمن التسلية ويغلب، رغم ذلك يعني كله الوساطات ومعارف وهاظ وهاظ تحيلنا للمشكلة قالوا خلاص يا شيخ يلا مسموخلكوا عاد عاد دبرنا، طبغًا هون صار العزل بدهم يعزلونا كمجموعة أنا وأبو العز وصاعق إليّ هو اللواء

خالد المدهون و آه أربعة إحنا انعزلنا، أخذونا على حرسنا إيه على وين عا الشسمو هاي إليّ هي جنب حمورية جنبها جنب جنب حمورية، هناك المنطقة المنطقة إليّ إحنا ساكنيها والدار هاظ لمن لفتح ملك لفتح، صُرنا ندرب عالسكت ويجبولنا أكل لعندنا هناك، ويوم من الأيام ولا هي قيامة القيامة بالليل في عرس وجاي واحد من الصاعقة أو إبصر منين ورايح يطخ بالعرس إلهم يعني فرح ويطخ بيحي اثني عشر واحد مدني صوابهن صار استنفار قالولي شيخ هيك هيك واستنفر طب شو طالعلي مستنفر بس يعني بدي أطخ حدا من البلد مستحيل يعني أزيد البلة طين، يا خالد هون وهون وهون واقفين ظلينا، اسمها البلد بيت سوا بيت سوا عدت الأمور ظلينا إيش قاعدين وتندرب، وهالدربين يجوا عندنا إجي عيسى قال له هاظا مدرّب كان بده يدربي، بدي آي أسويلكوا أكله وداع قال شو شو بديك تسويلنا قال طيب، ويسويلنا منسف بس شو المنسف لا مليح ولا جاج منسف وزغاليل محشية، قال بدي أغديكوا قلنا له يعني زي ما تقول قربت إل إيه العملية ولا هو جاي مجيد وهاظ قال بدكوا تسجلوا وصاياكوا، يالله بدا قتلته بسم الله الرحمن الرحيم ومن هاظ إيش محمود إبراهيم ومحمود طويط قائد عملية شهداء الفردان وبدنا ننتقم للشهداء الثلاث، ومن هالمواضيع سجلوهن وهاظ، قال بس بدكوا تعرفوا إشي قبل ليصير أي إشي، ترى إنتوا تسعة وتسعين بالية مستشهادين، طيب إحنا صرنا فترة إجي يوم سمعت إنهم بده يغيروني ولا بقلولي شيخ أبو ماهر بده يوديك علييا تتدرب ضفدع شب بشري، قتلهم مابديش بعد فترة أبو نائر يا شيخ بدهم يودوك عاليابان تكمل كاراتيه قتلهم لأ وإنه بقولوا بالعربي الفصيح بدهم يحطوا فلان بدالك قتلهم بضرب عن الطعام، يومين دري أبو ماهر طلبني قال لي شو في؟ قلت له إنت شو فيه؟ قال إحنا بحاجتك وإنت زي ما تقول في عندك مؤهلات اختار بين ليبيا واليابان قتلته فلسطين، عنده مسحة دينية هو، قال لي ولا يهملك خلاص ليش ما بتوكليش قلت له لأ بوكل قال لأ مابتوكليش.

أحلام التميمي: [02:29:38]  
عيدلي اسمه على شان بس ما كان واضح؟

محمود طويط: [02:29:41]  
أبو ماهر.

أحلام التميمي: [02:29:42]  
أبو ماهر أبوا آه.

أحلام التميمي: [02:29:42]

غنيم عضو اللجنة المركزية.

أحلام التميمي: [02:29:44]  
تمام تمام، بس عشان.

محمود طويط: [02:29:46]  
مهوكان المسؤول عننا المباشر، قال لي هيك قلت له لا، لا يمكن ولا يابان ولا ليبيا أنا رايح  
عفلسطين، مشيت العملية طب هو كانوا قائلنا إنتوا أطول مسيرة إجي يوم قال جهزوا حالكوا  
تركبنا بهالاند وطلعنا من الشام إلى جبل العرب.

أحلام التميمي: [02:30:14]  
إنت و؟

محمود طويط: [02:30:16]  
آه أنا وأبو أنور هاظا إليّ كان مرافق إلنا أربعة إحنا كنا محمود طويط وخالد المدهون وصاعق  
وأبو العز، طبغًا هاظاك من شسمو قبل لا نطلع بقولوا لهم أنا أخوي بمصر جاي من مصر  
وبدي أروح أشوف مصر وبعدين باجي، قالولي إيش قتلهم حرين قال مين بديل، قتلهم  
البديل جمعة هاظ من مخيم سبينا شب هيشة زي ما تقول يعني حرك، ردوا أخذوا قرار قالوا  
لأ ما بنوديه لإنه بعرف كل شي وُصعب، انزلنا إحنا متفقين إنه في دليل وكل شي طلعنا من جبل  
العرب بعد ما أخذنا بلايز وأواعي مدنية وكل إشي إحنا مجهزين حالنا لأنه ما معنا سلاح، في  
نقطة معينة فيها سلاح كان في تي باستمرار يروحوا ويراقبوا المنطقة هسا توصلنا بصرى الشام  
عالاتار وهاظ.

أحلام التميمي: [02:31:29]  
مسير مشي؟

محمود طويط: [02:31:31]  
لأ لحد الآن بصرى الشام بالسيارة.

أحلام التميمي: [02:31:37]  
تمام.

محمود طويط: [02:31:37]

في دار جنبها معزمينا أكلونا اتعشيننا بعد العشا مباشرةً انطلاق المسير مشيًا على الأقدام، طبعًا  
هاظ بضل تمشي بتواجه شو الأردن سورية العراق يعني إل هاظا الطريق كلُّه تراب، امشي  
امشي يالله يا شباب يالله يا شباب يا الله يا شباب، ظلينا نمشي توصلنا الظليل كان في دار  
فتحولنا وسكروا علينا ظلوا نايمين طول الليل وصلنا الفجر، ثاني يوم المغرب يالله اطلعوا بسيارة  
عمان شربنا ميرندا وتزهنا وشغلات زي هيك، ظلينا من عمان من معان من عمان طالعين  
باتجاه مناطق الجنوب توصلنا قبل القويرة العقبة، في بيوت شعر نزلونا فيها نمنا وطبخولنا  
وأكلنا وظلينا لثاني يوم المسا من هناك انطلقنا أخذنا وادي عربة ونزلنا فيه بنام بالنهار ونمشي  
بالليل.

أحلام التميمي: [02:33:07]

عفوًا كل إل التفاصيل هاي خطة المسير وتفصيل العملية كنتوا مناقشينها مع أبو ماهر غنيم  
خطوة بخطوة ولا فقط هو إنكوا تنفذوا عملية واذهبوا بهاي؟

محمود طويط: [02:33:19]

لا الدليل هاظا رايح جاي الدليل كل يوم بكشف المنطقة وبروح وييجي.

أحلام التميمي: [02:33:25]

نعم.

محمود طويط: [02:33:25]

ومعروف وين محطوة الأسلحة.

أحلام التميمي: [02:33:25]

طيب.

محمود طويط: [02:33:25]

هسا نزلنا تنام وتمشي تنام وتمشي تا إيش قرينا، آه وين السلاح؟ قالوا إيش السلاح مدفون  
هم ودونا لاثنين أبو محمود وإحنا الثاني طب وين مدفون؟ دوّر دوّر ما لقوش طيب قبل هيك  
وين الأكل؟ قالوا عند العرب راحوا على العرب ولا إجوا قالوا تبروا مننا، طب شلون بدنا نمشي؟

قال والله هاظا إليّ صار شو رأيك؟ قتلهم إيه نستمر شو إليّ رأيك إيوا، دوّر ملقناش شوي وّلا بقولوا لقينا السلاح، وّلا آني كنت مستعد لشغلات ثانية حسب الأوامر، قلت الحمد لله قبضنا السلاح ونظفناه وزبطناه إلبسنا نزلنا آخر نزلة إيش وادي عربة هسا الوادي كثير فيه.

أحلام التميمي: [02:34:29]  
إيش كان السلاح إليّ؟

محمود طويط: [02:34:31]  
إحنا معنا كلاشنكوف وذخيرته عبوات ناسفة صغيرة منشان البواب بدنا نهاجم فندق كنا، آه منشان نفجره وقنابل هجومية ودفاعية أمريكية كانت يعني دبل يعني تستخدم لشغلتين صوتي بتكون أو إيش قتالية يعني بتفك الغطا بتصير صوتية.

أحلام التميمي: [02:34:57]  
طب أنا أنا هذا سؤالي إنه كنتوا بدكوا تهاجموا فندق كل خطة إل الموضوع كنتوا مناقشينها قبل.

محمود طويط: [02:35:06]  
آه آه آه.

أحلام التميمي: [02:35:06]  
إنه الهدف إيه شو بدكوا تعملوا؟

محمود طويط: [02:35:08]  
منا معي بعني كل المناشير.

أحلام التميمي: [02:35:10]  
آيوا.

[02:35:10]  
وبدك تقابل السفير الفرنسي والبريطاني وال(..).

أحلام التميمي: [02:35:15]  
كنتوا مع مين مع أبو ماهر غنيم كل هذا الكلام.

محمود طويط: [02:35:17]  
أيوا.

أحلام التميمي: [02:35:17]  
تفاصيل العملية.

محمود طويط: [02:35:20]  
آه أو، أبو ماهر إليّ بشرف بشكل عام لكن إيش مجيد وهاظا المجيد الأساس في الموضوع يعني إليّ انزلنا هسا قلنالهم طيب استعديتوا استعديتوا صفينا صليت فيهم صلاة الجهاد وبالله انطلقوا، هسع إحنا المنطقة مكشوفة وممسوحة وبعدين شو كف، هسا أمامنا شو نسوي نقص الشيك قصينا الشيك، صار انفجار صار انفجار وخلص قالوا خلص بدنا نرجع قلت لهم استنوا رجوع مافيش لّما صار انفجار البدوي ذكي، وبعرف إنه مسؤولية يرجع مهو مش عادية، قال لي بدني أفتش الكل فهمت آني قلت له طيب، هسا أي واحد بدو يرجع إيه كذا بدني أطخ، قلت لأ أنا رزتها بعقلي، ترى في أحياناً بالمعركة ما فيه إنه إنت تفكر تأملي لازم يكون تفكيرك ديناميكي، يعني تبدك هيك وتصفن وشو أسوي هاظا مش بالحرب هاظا بدك تكون مفكر بدك تنشر كتاب بدك تسوي إشي، رأساً أنا حللت قلت آه في خطأ من عندنا بس الخطأ ما بتعالج بخطأ ورح إيش نروح ضياع قلت له لأ خلص، هو شك بواحد قال هاي قنبلة صوتية قام الغطا ورمهاها منشان صوت نرد نرجع، قلتلهم اسمعوا أقولكوا مين بدو يمشي معي ومين بدو يرجع؟ هظلاك الاثنين قالوا إحنا بنرجع.

أحلام التميمي: [02:37:13]  
إليّ هم الأسماء؟

محمود طويط: [02:37:16]  
أبو العز والصاعقة.

أحلام التميمي: [02:37:17]  
نعم.

محمود طويط: [02:37:19]

خالد قال أنا معك قلت له ماشي تمام خليكوا هون إنتوا، هذولاك امشوا معاي مفيش مي قال إحنا خابرين ورا الشيك في بير منطلعلكوا منه مي قلت لهم ماشي، قصينا الناحية الثانية ومشينا هسع صاروا بالمنطقة كلها استنفرت وكل الجيش على دراية إنه في تسلل، هسا بدها إيش تبدا مطاردة إحنا شو لابسين أكثر من حذا إلبسنا إيش حذا المدني وماشين وبأواعي المدنية.

أحلام التميمي: [02:37:59]

إيش اسمه الفندق إلي أصلا كنت رايعين تستهدفوه؟

محمود طويط: [02:38:02]

لأ إحنا بدنا جنب مزرعة جولدا مائير في هناك، يعني الهدف مزرعة جولدا مائير بعد شارع تمناع يكون هناك إيش الهجوم يعني إيش تحتجزوا عسكريين في هناك، طيب.

أحلام التميمي: [02:38:18]

احتجاز العسكريين بغاية التبادل.

محمود طويط: [02:38:21]

آي هو آه الاحتجاز من أجل التبادل.

أحلام التميمي: [02:38:24]

نعم.

محمود طويط: [02:38:25]

ومراحل هذيك شو بصير معك أثناء هاظ، بدك تقول إحنا كذا وتسلم الوراق للي بيحي للسفرا الأجانب، هي هاي العملية رد للشهدا، اثنين رد على مشروع كيسنجر لأنه بطل يحيي مع إشي اسمه فلسطيني، صار بده عن طريق مصر عن طريق كل العالم ما عدا القضية الفلسطينية، فبدهم يشعروهم إنه فلسطين موجود وما بصير تفاوض وما بصير حل إلا بوجودنا تجاوزنا لأ، يعني هدفين سياسي وعسكري ردع للشهدا اثنين إلي هو سياسيًا نحن موجودين يعني التعليمات موجودة، المهم مشينا وشو خالد قال ترى الأضواء وانا قتلته مش مشكلة اقطع خيلنا نصلي العشا قال في وحوش هون قلت له اقطع صلينا العشا وظلينا مستمرين، إجينا

على البير هاظا إليّ قالوا عنه فعلاً طالوا مي شرينا مي تنعنشنا، بس بعدنا بلا أكل ها ظلينا مطاردة هسا كثر إيش مطاردتنا قال خالد مافيش غير نخطف سيارة، بلشنا هسع السيارات شو ما كلها معها علم إنه في متسللين، كل ما تيجي عسيارة تفل ولا واحد رضي يوقف، أخذنا حول ساتر والصاعق خالد بلش يطخ ما حدا استجاب، قربت إيه قربت إيش إل المطاردة علينا قال إمشي تنمشي بلكي أخذنا ستر وإحنا نمشي يمكن ظل أقل من نص كيلو بنصل، مافيش في تلة وفيها زي مغر، فتنا بالمغر صرنا نتناقش أنا وخالد فت يعني إيش صارت تقرب اثن ظلينا طول الليل وحنا ضمن المطاردة لثاني يوم الظهر صارت الساعة إحدى عشر، هسع شو حولينا؟ الدبابات الجيبات الطائرات هليكوبتر يعني كل المنطقة حولينا إحنا محاصرين بكل إشي، قلنا طيب هاظ الهدف العسكري انتهى هسا بظل إيش الهدف السياسي، المهم اطلع اطلع اطلع اطلعنا، هسا منو كان إيش قائد الحملة بطارد فينا الجنرال قائد المنطقة الجنوبية كلها، اوصلناه ارفع إيدك ارفع إيدك، فتشونا عادي بس كل الموجود هون ما شافوه، أنا ما بحكي عبري خالد بحكي عبري لو إنه كان مسجون قبل هيك، شو بقولوا قلت له خالد قول له إنه في معه أوراق بدي تسلمها للسفرا، لما حكي معه شو شو بتفتشو فيه وبين المفتشينه إنتوا، إذا هاظا كله معه ابعدوا كلهم، صرنا نطوله بالأوراق وسلمناهن طبغاً مش رايعين يسلموهم بس يعني هاظا إليّ عندي مفيش إمكانية غير هيك، جابوا هالهيكوبتر حطونا بهالهيكوبتر وعالمسكوبية.

أحلام التميمي: [02:42:05]

طيب هون الاشتباك يعني صار اشتباك إنو ما قتلنا حدا ما؟

محمود طويط: [02:42:11]  
لألاً.

أحلام التميمي: [02:42:11]  
ما صار بس المطاردة واعتقلوكم.

محمود طويط: [02:42:17]  
ما ظل آه.

أحلام التميمي: [02:42:17]  
تمام، وبالهيكوبتر أخذوك إنت وخالد.

محمود طويط: [02:42:20]  
آه.

أحلام التميمي: [02:42:20]  
إلى المسكوبية.

محمود طويط: [02:42:23]  
آه آه بالتحقيق يعني.

أحلام التميمي: [02:42:24]  
بل إيه.

محمود طويط: [02:42:25]  
بالتحقيق وهناك إيش بدت جولة ثانية يعني فصل ثاني.

أحلام التميمي: [02:42:29]  
فصل ثاني من الاعتقال، ترا ما حكيتلي عن أبو عمار وأكل العدس ول ول ول هاي الشغلات.

محمود طويط: [02:42:35]  
أنا هظياك وحدة ثانية لّما إجي علينا أبو عمار كان الوفود جاي وزعونا خارج المعسكر كلها كدوريات، لأنه كان في وفد وفد بده يجي بالبقاع، طبعا إحنا ما حضرنا شو صار جوا عبارة عن حماية يعني كان إيش بيحي بصير مؤتمرات هناك لأنه مؤتمر الشهيد قاعة الشهيد فؤاد القواسمي كان فيها يصير اجتماعات كثيرة.

أحلام التميمي: [02:42:59]  
أبو جهاد كان يجي عالمعسكر.

محمود طويط: [02:43:02]  
مهو قتلك لّما آني استلمنا إليّ هو هدية فيتنام هو إليّ كان يقول يا إما عسكري يا مدني كان هو وين ديبكتك يقول عننا يعني الديكة، هاظا إله لقا معه مش هون بوادي صقر أخ أبو جهاد

مرة، بعد ما اطلعنا من السجن انتدبونا اثني عشر واحد أنا وخير شلي وأكم من واحد قال اقعدوا، قال طبعًا أنا في عندي تجربة سجن قبل هاظ، بس الشباب إليّ معي كلهم انسجنوا عند اليهود، قالوا شو يا شباب شو اقتراحاتكم كلها صارت اطخ لو تفتحلنا مكتب للترجمة لو تفتحلنا مكتب هيك لو تفتحلنا، طبعًا بيوخذ اسمك واحكي اسمك إجابي الدور قلت له محمود إبراهيم طويط، قال تفضل قلت له بدي أسألك سؤال قلت له إحنا مطولين؟ مطولين هون، شوفي الشباب كلها حامية، هزراسه وصار يضحك قال والله ممكن ما يكون أسابيع بعد فترة اطلعوا من إل(..)، ليش يعني لما يكون ما عندوش تجربة سابقة الواحد هاظ، ويعرفش وشو بالسياسات بكون مندفع بده يسوي كل إشي، لا يا عمي إنت وين إنت فيش عندك دولة فيش عندك أرض قرارك إيش بده يكون وين بحجم إنت المساحة المسمو حلك فيها.